

四庫全書

子部

欽定四庫全書

子部

天中記卷二

詳校官中書臣李彤

主事臣祁韜士覆勘

總校官候補中允臣王燕緒

校對官編修臣王天祿

謄錄監生臣葉世倬

欽定四庫全書

天中記卷二

明 陳耀文 撰

星

陽之榮星之為言精也陽之榮也陽精為日日分為星  
故其字曰下生為星春秋說

元氣之英星者元氣之英也

三五  
歷說

萬物之精萬物之精上為列星

文說

坤德布精上為衆星

圖河

水土之氣上為曾亩萬物之精凝為列緯皆本於地

而發於天者也

杜收孫子註

金之散氣星者金之散氣其本曰人星衆國吉少則凶

孟康曰星石也金石相生人與星氣相應也

前天文志

山川之精地為山川山川之精上為星各應其州城分

野為國作精符驗也

周易精符

山川精氣上為列星

唐嚴思善傳

體生於地地有山嶽川谷井泉江河洞湖池沼陂澤溝壑以宣吐其氣也天有列宿星辰三百四十八座亦天

之精氣所結成凝瑩以為星也星者體生於地精成於天列居錯峙各有適屬在野象物在朝象官在人象事其以神著有五列焉是為三十五名一居中央謂之北斗四布於方為二十八宿中外之官常明者百有二十四可名者三百二十為星二千五百微星之數益萬一千五百二十庶物蠢蠢咸得繫命靈

萬物之體星者陰陽之精萬物之體五行之形其體在下精耀在天百官之命各因其原飛又行萬人不安

京房

易傳

象官書正義云天有日月照臨晝夜猶王官之伯率領諸侯也北辰環繞北極猶卿士之周衛天子也五星行於列宿猶州牧之省察諸侯也二十八宿布於四方猶諸侯為天子守土也

常星衆星常星猶公卿也衆星猶萬民也列星正則衆星齊常星亂則衆星墜矣益銕論劉向云天官列宿在位

之象小星無名者庶民之類

恒星穀梁傳曰列星曰恒星亦曰經星恒經皆常也

天極中宮天極星其一明者太乙常居也

史記三公侍旁

藩臣環翊璇璣玉衡高揭衡峙文昌秦階森布暉映其垣為紫微其象為樞紐在人則廣朝路寢造命出政之廷萬方之所內面而觀仰也蒼龍主東赤鳥司南於菟神龜儼列西北其舍二十有八其度三百六十有五在人則九畿五服庶邦庶尹之位上之所賴以繫方而作屏也

王海靈紫宮為皇極之居太微為五帝之廷

靈憲

北斗天文地理各有所主北斗有七星天子有七政也  
春秋合  
城圖 北斗七星所謂璇璣玉衡以齊七政杓攜龍角

衡殷南斗魁枕參首是謂帝車運於中央臨制四鄉分

陰陽建四時均五行移節度定諸紀皆繫於斗史記斗第

一天樞第二璇第三璣第四權第五衡第六開陽第七  
搖光第一至第四為魁第五至第七為杓合而為斗居

陰布陽故稱北

春秋運

天之喉舌斗者天之喉舌玉衡屬杓魁為璇璣

文耀鉤

李

固對詔陛下之有尚書猶天之有北斗也斗為天喉舌  
尚書亦為陛下喉舌斗斟酌元氣運平四時尚書出納

王命賦政四海所謂制氣之臣也

後漢書

天理在斗中司

三公也如人喉在咽以理舌語宋均注曰斗為天之舌  
口主出政教三公主導宣君命喻於人則宜如人喉在  
咽以理舌口使言有條理

春秋合誠圖

天中之精易是類謀曰斗機絕綱玉衡撥攝提亡五星  
合狼狐張鄭玄斗者天中之精天失其平故斗機絕綱

玉衡撥也攝提者斗前之星為斗施政教布之八野今  
斗失其政故攝提亦為之亡不見也

攝提似眉春秋元命苞曰天有攝提人有兩眉為人表  
候陽立於二故眉長二寸注云攝提兩星頰曲人眉似  
之漢書翟方進云今提揚眉服虔曰提攝星揚眉揚其  
芒角也

失方劉向奏云孔子對魯哀公言夏桀殷紂暴虐天下  
故歷失則攝提失方孟陬無紀前漢書

天階北斗為帝座上有三台形如雙目疊為三級以復斗魁是名天階斗中復有尊帝二星大如車輪若人見之壽可千歲

王樞經

三台為天階太一躡以下上

晉天文志

三台魁下六星兩兩相比者名曰三能三能色齊君臣和不齊為乖戾

史記

李奇曰三台謂之泰階

漢藝文志注

泰階黃帝泰階六符經曰泰階者天之三階也上階上星為男主下星為女主中階上星為諸侯三公下星為卿大夫下階上星為元士下星為庶人三階平則陰陽

和風雨時社稷神祇咸獲其宜歲大登民人息天下大安是謂太平不平則五神乏祀日有食之水潤不浸稼穡不成冬雷夏霜百姓不寧故治道傾天子行暴令好興甲脩宮榭廣苑囿則上階庵庵疏闊也

文昌斗魁戴匡六星曰文昌宮一曰上將二曰次將三曰貴相四曰司命五曰司中六曰司祿史記

天府文耀鈞曰文昌宮為天府孝經援神契云文者精所聚昌者揚天紀輔拂並居以成天象故曰文昌宮晉

志曰文昌六星在北斗魁前天之六府也主集計天道  
三公杓南三星及魁第一星西三星皆曰三公主宣德  
化調七政和陰陽之官也

晉志

四輔太微東藩四星一曰上相二曰次相三曰次將四  
曰上將所謂四輔也西藩四星一曰上將二曰次將三  
曰次相四曰上相亦曰四輔也

東壁東壁二星主文章天下圖書之祕府也占若明則  
圖書集道術行小人退君子入不然則天子好武臣賤

文士稽古中正之臣隱親黨邪曲之人用也

太象列星圖

屏星孝經內事曰王者遠嫌別微殊貴賤抑驕臣息亂子則屏星為之明以潤帝座章而光宋均曰屏星五帝座明以潤章大也

鈎鈴孝經內事曰昆弟有親親之恩則鈎鈴不離房宋均曰鈎鈴遠房則踈濶今昆弟相親故天相近明其及也老人星史記曰狼北地有大星曰南極老人老人見治安不見兵起常以秋分時候之於南郊隋志曰老人一

星在弧南一曰南極常以秋分之旦見於丙春分之夕  
一作夜  
沒一作見於丁見則化平主壽昌月令秋分日饗壽

星於南郊注云壽星南極老人星也爾雅云壽星角亢  
也注云數起角亢列宿之長故云壽星唐會要開元敕  
有司置壽星壇以干秋節日脩祠祭老人星及亢角七  
星著之常式

景星史記曰天暝而景星見景星者德星也其狀無常  
常出於有道之國瑞應圖曰景星者大星也狀如牛月

生於晦朔助月為明王者不私人則見袁山松書漢桓帝時陳蕃劉知茂上書云夫氣弘則景星見化錯則五星開徐陵陳武帝報德寺刹下銘曰助月致景星之祥非烟流慶雲之色

妖星妖星曰孛星彗星長星亦曰攬搶天文錄曰孛星者彗之屬也偏指曰彗芒氣四出曰孛孛謂孛孛然也灾甚於彗爾雅曰彗星為攬搶司馬相如大人賦攬攬搶以為旌後漢崔篆慰志賦運攬搶以電掃兮清六合

之土宇謝瞻張子房詩鴻門銷薄蝕垓下隕攬搶注喻  
羽也後漢杜篤論都云高祖奮彗光埽項軍注彗除舊  
布新故曰埽

貫索星貫索九星在七公前為賤人牢口一星為門門  
欲開開即有赦九星皆明天下獄煩七星見小赦六星  
五星大赦動則斧鎖用中空則更元石氏星經晉志孫狄云天  
市星繁歲豐稔也貫索星少獄無囚也熒惑帶休色刑  
措不用也

流星淮南子流星色赤名曰地鴈其所墜者起兵流星有光青赤名曰天鴈軍甲之精華也天文要集云流星入昴貴人囚係

怪星袁山松書云怪星晝行名曰營頭行振大誅也

客星客星有三一曰老子二曰國星三曰溫星老子稱李耳古之有德行而不仕老而有壽之人國星者國皇也不知何國人溫星者溫其姓古之有操行而不仕者也三人者其精皆為星命之為客星

中興文志

軒轅 軒轅十七星在七星北黃龍之體主雷雨之神後  
宮之象也陰陽交感雷激為電和為雨怒為風亂為霧  
凝為霜散為露聚為雲氣立為虹蜺離為背璣分為抱  
珥二十四變皆軒轅主之

史正義

金虎 陸士衡詩大辰匪暉金虎曜質石氏星經曰昴者  
西方白虎之宿也太白者金之精太白入大昴金虎相  
薄主有兵亂也

五才之靈夫陰陽二氣淘育羣品精象所寄是為日月

羣生之性章為五才五才之靈五星是也

宋歷志

五行之精五星者五行之精五帝司命應天之號令為

天之節度

前李辱傳

天有五帝五星為之使

隋文志

天之五佐五星者天之五佐為經緯見伏有時所過行

羸縮有度

史記

五辰凡星皆出辰沒戌故五星為五辰十二舍亦為十二辰歲星司肅典致時雨熒惑司哲典致時燠太白司火典致時暘辰星司謀典致時寒填星司聖典致時風

經星有常不變緯星有伏見進退與日相終始

更王相休廢星備云五星更王相休廢其色不同王則光芒相則內實休則光芒無角不動搖廢則少光色順四時其國皆當也

保章氏疏

失政政失於春歲星盈縮政失於夏熒惑逆行政失於秋太白出入無常政失於冬辰星不效其鄉

文子

五星聚周將伐殷五星聚房齊桓將霸五星聚箕漢高入秦五星聚東井

宋志五星聚於冀方而魏有天下

魚豢典畧

五星聚箕尾安祿山反於燕

唐志

宋祖啓國五星聚奎太

宗即位五星在奎

宋史

四星聚四星聚柳張而光武興復于洛

宋志

四星聚尾箕

而曹公迎帝都許充豫遂定後四星復聚魏文受禪

驗異

四星聚牛女而元帝中興揚土

晉書

宋武北伐四星聚

奎及西伐秦四星聚井四星聚參而渤海始霸四星聚

危而文宣受終

魏書

四星聚張而周太祖代漢

五代史

參商子產曰昔高辛氏有二子長曰閼伯季曰實沈不

相能也日尋干戈以相征討八帝不滅遷關伯於商丘  
主辰商人是因故辰為商星遷實沈於大夏主參唐人  
是因故參為晉星

左昭元年

孛字本黃帝時一女子脩行不得其死

中興文志天

景星見史記曰黃帝時景星見形如半月可以夜作尚  
書中候曰帝堯七政七十載景星出翼春秋佐助期曰  
舜之時景星出房

堯五老論語誠曰仲尼曰吾聞堯率舜等遊首山觀河

諸有五老遊焉一老曰河圖將來告帝期二老曰河圖將來告帝謀三老曰河圖將來告帝書四老曰河圖將來告帝圖五老曰河圖將來告帝符龍御王苞金泥玉檢封盛書咸曰知我者重瞳姚黃五老因飛為流星上入昴拾遺記云虞在位五老遊於國都禪於禹五老去不知所之

堯填星大象賦云欽明光被填逆水府洪波滔天功隆大禹注昔堯遭大水填星逆行入水府

舜黃星元魏張淵觀象賦嘉黃星之靡鋒明虞舜之不競注昔舜將受禪於堯先有星見員而無鋒芒言舜當用土德王天下星見而無鋒角者示揖讓而受不以兵事爭競也本傳羅泌路史云舜十有七年天見妖孽黃星靡鋒帝乃死注引此證之且以魏為宋異哉

帝王星精堯翼之精星在南方色赤舜斗之星精在中央色黃禹參之星精在西方色白湯虛之星精在北方色黑文王房星之精在東方色青感精符注

奚仲託精觀象賦云奚仲託精於津陽注奚仲四星在天津北近河傍太古時造車輿者死而精上為星水北曰陽在河北故曰津陽也

鑄鼎星見王子年拾遺記曰禹鑄九鼎擇雌金為陰鼎雄金為陽鼎太白星見九日不沒

歲星順行昔湯之元祀歲星順行與日合於房房心宋毫分也周武王至豐之明年歲星順行與日合於柳留於張柳張河洛分也

程史

傳說乘尾莊子曰夫道可傳而不可受得而不可見傳  
說得之以相武丁奄有天下乘東維騎箕尾而比於列  
星觀象賦曰傳說登天而乘尾注傳說一星在尾後乘  
尾在龍駟之間 石氏云傳說一名太祝鄭樵通志云  
謂之傳說者古有傳母有保母傳而說者謂傳母喜之  
也偶商之傳說與此同音諸子家不詳審其義則曰說  
騎箕尾殊不知箕尾專主後宮之事故有傳說之佐焉  
按在天為星辰在人為聖賢於理固有然者乃變古而

曲為之說則造父奚仲玉良亦皆古人也又將何說乎

迎歲周文王受命歲星在鶡火武王伐紂十三年歲星

在鶡火

魏志 蘭林傳

武王伐紂東面而迎歲至汜而水至共

頭而墜彗星出而授殷人其柄當戰之時十日亂於上

風雨擊於中然而前無蹈難之賞而後無遁壯之刑白

刃不畢拔而天下得矣

淮南子 略訓 兵

武王伐紂魚辛諫曰歲

在北方不壯征武王不從

尸子

天龜國語云伶州鳩對周景王曰武王伐殷歲在鶡火

星在天龜我姬氏出自天龜天龜即玄枵齊之分野也  
王季之母太姜齊女也故言出於天龜

夢北斗觀象賦曰疇呂尚之霄夢善登輔而翼聖注曰  
昔太公未遇文王時釣魚於磻溪夜夢北斗輔星神告  
尚以伐紂之意事見尚書中候篇也

祭畢畢為天網主網羅無道之君故武王伐紂上祭於  
畢求助天也

後漢書  
竟傳

九光王曰余不知九星之光周公旦曰九星星辰日月

四時歲是謂九星九星九光

周

任昉敦勸梁王令曰重

構參辰而九星仰止不易日月而二儀貞觀

感星微子感牽牛星顏淵感中台星張良感弧星樊噲

感狼星

劉子

星孛五色貫紫微昭王末年有星孛見光五色貫於紫  
微荆人卑詞致於王曰願獻白雉乃密使漢濱之人膠  
船以待王遂南巡狩將底於海天大曠雉兔皆震喪六  
師於漢時王至中流膠液船解王及祭公辛餘靡溺

竹書

紀年

造父王良觀象賦云仰見造父爰及王良注造父五星在傳舍河中造父周穆王御死精上為星王良五星在奎北王良者晉大夫善御九方數之子良一名郵無正為趙簡子御死精託於星為天帝之駄官韓陽天文要集曰造父洗馬轡勒銜鑣史記曰王良策馬車騎滿野北斗三台並流周厲王時北斗與三台並流不知其所屬王沒后兩主星復見

獨異

志

天中記

觀星識霸觀象賦云欽管仲之察微見虛危而知命注  
云昔管仲與鮑叔牙商賈於南陽見三星聚虛危之分  
知齊將有霸主遂共戮力來投齊地也

恒星不見四月辛卯夜恒星不見夜中星墮如雨

左莊七年孝經鉤

彗入斗周襄王不能事其母弟彗入斗亡其度

命決

亥枵春無氷梓慎曰今茲宋鄭其饑乎歲在星紀而淄  
於亥枵蛇秉龍龍宋鄭之星也宋鄭必饑亥枵虛中也  
枵耗名也上虛而民耗不饑何為

左襄二十八年

星孛於辰冬有星孛於大辰西及漢申須曰彗所以除舊布新也今除於火火出必布焉諸侯其有火灾乎梓慎曰在宋衛陳鄭裨龜言於子產曰宋衛陳鄭將同

日火若我用瓘蕡玉瓊鄭必不火鄭人請用之子產曰天道遠人道邇非所及也龜焉知天道遂不與亦不火

左昭十  
八年

得星吳伐越史墨曰不及四十年越其有吳乎越得歲而吳伐之必受其凶

左昭三  
十二年

禳彗齊有彗星景公坐柏寢而泣晏子問之公曰寡人聞之彗星出其所向之國君當之今彗星出而向吾國我是以悲晏子曰君之行義固應無德於國穿陂池則欲其深以廣也為臺榭則欲其高且大也賦歛如搃奪誅戮如仇讎自嬰觀之寧又將出彗星之出庸何懼乎公欲使常伯騫禳之晏子曰無益也祇取誣焉天道不謠不二其命若之何禳之使神而可祝而來亦可禳而去也百姓苦怨以萬數而君令一人禳之安能勝衆口

乎

史記晏子  
春秋左傳

觀星知動地齊景公問太卜曰子之道何能對曰能動地公以告晏子晏子出見太卜曰昔吾見鈞星在房心之間地其動乎太卜曰然晏子出太卜走見公臣非能動地地固將自動論晏子見常伯騫問曰昔吾見維星絕樞星散地其動乎

晏子  
春秋

彗星籠月春秋後傳曰魏人唐雎對秦王曰專諸之刺王僚彗星籠月無色

紫微降光仲尼春秋成紫微降光

抱朴子

孛於東方魯哀公十三年十一月有星孛於東方明年  
春秋之事終是謂諸夏微弱蠻夷遞霸田氏專齊三族  
擅晉卒以干其君明而代奪之陵夷遂為戰國天下橫  
流矣

魏書

星孛東北春秋星孛北則齊魯晉鄭陳宋莒之君並受  
殺亂之禍星孛東方則楚滅陳三家由此分纂齊晉

宋書

熒惑退舍宋景公時熒惑守心心宋之分野也景公憂

之司星子韋曰可移於相公曰相吾之股肱曰可移於  
民公曰君者待民曰可移於歲公曰歲饑民困吾誰為  
君子韋曰天高聽卑君有君人之言三熒惑宜有動於  
是候之果徙三度

呂氏春秋

彗何知昔楚將軍子正與齊戰未合夜彗星出柄在齊  
所在勝不可擊子正曰彗何知明與齊人戰大破之

尉繚子

太白食昴前漢鄒陽上梁孝王書曰衛先生為秦畫長  
平之事太白食昴昭王疑之蘓林曰白起為秦伐趙破

長平軍欲遂滅趙遣衛先生說昭王益兵糧為應候所  
害事用不成其精誠上達於天故太白為之食昴

彗孛大角秦史云始皇之時彗孛大角西漢詞圃曰項  
羽之敗孛大角劉向曰三代之亡攝提易方秦項之滅  
星孛大角

五星會南斗秦一世時五星會於南斗南海尉任囂曰  
秦方長亂此南越偏霸之象也遂有志焉病且死召真  
定人趙佗行南海尉事故今呼為尉佗漢高帝遣陸賈

立為南越王

南越志

太白竊織女侍兒秦併六國太白星竊織女侍兒梁王

清衛承莊逃入衙城小仙洞四十六日不出天帝怒命

五岳搜捕太白歸位衛承莊逃焉玉清有子名子休玉

清謫於北斗下常春其子乃配與河伯驂乘行雨子休

每至小仙洞耻其母淫奔之所輒回馭不經故此地常

少雨

東方朔內傳獨異志

枉矢西流漢書曰項羽救鉅鹿枉矢西流枉矢所觸天

下之所伐射滅亡象也羽遂合從阨秦人屠咸陽凡枉  
矢之流以亂伐亂也張衡周天大象賦云蛇隨楚而九  
域含嗟觀象賦云恒不見以周衰枉蛇行而秦滅

天街史記云平城之圍月暉參畢七重漢書曰畢昴間  
天街也街北胡也街南中國也昴為匈奴參為趙畢為  
邊兵是歲高祖自將至平城為冒頓所圍七日乃解

昴星精春秋佐助期曰漢相蕭何長七尺八寸昴星精  
生耳三漏月角大形鈎命決曰蕭何為昴精項羽陳勝

胡亥為三滑

天狗漢文帝後二年八月天狗下梁墾景帝三年七月  
天狗下天狗所降以戒守禦其年吳楚反攻梁梁堅城  
守遂伏尸流血其下大象賦狗過梁而千里流血

客星掩帝座武帝嘗微行造主人家仍留宿夜與主婢  
卧有一書生亦寄宿善天文忽見客星將掩帝座甚逼  
書生驚呼咄咄不覺聲高又見一男子操刀將入戶聞  
書生聲急遂縮走客星應時而退如此者數過帝異而

問之書生具說所見帝乃悟曰必此人壻也將欲肆凶惡於朕乃語主人召集期門羽林擒奴問而款服乃誅之帝嘆曰斯蓋天啓書生以扶祐朕躬乃厚賜書生焉

幽  
明  
錄

折木指彗武帝嘗見彗星方朔折指星之木以授帝持以指彗彗遂沒星出之夜野獸皆鳴或說為獸鳴星郭子

橫洞  
冥記

帝皇太尊北斗九星七見二隱其第八第九是帝皇太

尊精神也漢相國霍光家有典衣奴子名還車忽見二  
星在斗中光明非常乃拜而還遂得增年六百

玄門寶海經

天星盡搖元光中天星盡搖上以問候星者對曰星搖  
者民勞也後伐四夷百姓勞於兵革

漢書內傳以爲東方朔

歲精王母遣使至東方朔死上疑問使者對曰朔是木

帝精為歲星下遊人中以觀天下非陛下臣也

漢武內傳

彗出牽牛哀帝建平二年彗出牽牛日月五星所從起  
厯數之元三正之始彗而出之改更之象也其後王莽

篡國

漢書

神星晝見光武破王尋與朱然書曰交鋒之日神星晝

見太白清明

東觀漢記

三星在漢分王莽時寇賊羣發郅惲仰占玄象歎謂友

人曰方今鎮歲熒惑並在漢分翼軫之域去而復來漢

必受命福歸有德如有順天發策者必成大功

後漢演孔

圖曰卯金刀名為劉中國東南去荊州故為漢分也

星繞劉聖公初得璽綬之夕有流星下降如繩繞聖公

明日為劉盆子將謝祿縊殺之亦繞星之象

後漢

二使和帝即位分遣使者二人各至州郡觀採風謠二人當到益部投候館吏李邵舍夏月露坐邵問曰二君發京師時知朝廷遣二使至郡問何以知之邵指星云有二使星來向益部耳

漢書

大陸後漢魯恭傳云仲夏行秋令則人傷於疫注大陵之氣為害也春秋合城圖云大陵星主死喪也

一名積尸卷古

策馬星不動周騰字叔達為侍御史桓帝當南郊平明

應出騰仰觀曰夫王者象星今宮中星反策馬星悉不動明日必不出至四更皇太子卒遂止

豫章列傳

德星見太史言有德星見當英才賢德同遊者詔下下諸郡縣問頴昌郡上事曰有陳太丘父子三人俱共會

社

漢雜事

陳太丘

云

詣荀朗陵

世說

於時太史奏真人東行

世說

德星聚陳仲弓從諸子姪造荀季和父子於時德星聚

太史奏五百里內有覽人聚

異

兄弟夜過荀爽

濟南先

賢傳

南斗注生管輶至平原見趙顏貌主夭亡顏父乃求輶

廷命輅曰子歸覓清酒鹿脯一觔卯日刈麥地南大桑  
樹下有二人圍碁次汝但酌酒置脯飲盡更斟以盡為  
度若問汝但拜之勿言必合有人救汝顏依言而往果見  
二人圍碁顏置脯斟酒於前其人貪戲但飲酒食脯不  
顧飲數巡北邊坐者忽見顏在叱曰何故在此顏唯拜  
之南面坐者語曰適來飲他酒脯寧無情乎北坐者曰  
文書已定南坐者曰借文書看之見趙子壽可十九歲  
乃取筆挑上語顏曰救汝至九十年活顏拜而回管語

顏曰大助子喜且得增壽北邊坐人是北斗南邊坐人  
是南斗南斗注生北斗注死凡人受胎皆從南斗過至  
北斗所有祈求皆向北斗

搜神記

東斗主筭西斗記名北

斗落死南斗上生中斗大魁總監衆靈

度人經

軫星逐鬼

張星拘魂東井還魄也

抱朴子

將星隕有星赤而芒角自東北往西南沒于諸葛亮營

俄而亮卒

孫氏晉陽秋

熒惑化小兒吳孫休永安元年有諸保質子羣嬉中有

一異兒眼有光芒爚爚外射諸兒問之曰我熒惑也將示爾三公歸於司馬言畢乃聳身而躍仰視之若曳一足練有頃而沒後四年蜀亡六年魏廢二十一年吳平是歸司馬也

宋書

中台坼張華為司空中台星坼少子隕勸華遜位華云天道玄遠須脩德以應之

晉書

張華將死中台星遂折太

元中復還合正太傅謝安為相所致也

晉書  
陽秋

月犯少微會稽謝敷字慶緒隱若耶山初月犯少微星

少微一名處士星占者以隱士當之時譙國戴達名著  
於敷時人憂之俄而敷死故會稽人士以嘲吳人云吳  
中高士便是求死不得死

晉陽

妖星見豫分初有妖星見於豫州之分歷陽陳訓嘗謂  
人曰今年西北大將當死

祖

亦見星曰為我矣方平河  
北而天欲殺我此乃不祐國也俄卒於雍丘

晉書

飲流星袁真在豫州遣女伎紀陵阿薛阿郭阿馬三奴  
與桓宣武既至經時三人夏夜同出月下有銅筭水在

其側見一流星墮瓮中驚喜共視星如二寸火珠於水底冏然明淨乃相謂曰此吉祥也當誰應之於是薛郭更以瓢杓接取並不得馬最後取星正入瓢中便飲之既而若有感焉俄而懷桓玄玄雖篡位不終而數年之

中榮貴極矣

續搜神記  
晉陽秋

星墮化肉漢主劉聰淫泆無度時有星墮平陽化為肉徑二十八步羣臣諫以淫色所致聰曰自是天家事於

朕何干

十六國  
春秋

聰曰此陰陽之理何關人事

載記

太白犯東井符生時有奏太白犯東井井秦之分也太  
白罰見必有暴兵起於京師生曰星入井者彼自渴耳  
何所怪乎載記

福德在燕符堅攻燕燕入大震封孚問申生曰事將何  
如生嘆曰鄴必亡矣然越得歲而吳伐之卒受其禍今  
福德在燕秦雖得志而燕之復建不過一紀耳及慕容  
暉降燕故太史黃泓嘆曰燕必中興其在吳王乎恨吾  
老不及見耳汲郡趙秋曰天道在燕不及十五年秦必

復為燕有

通鑑

后妃星失明符堅以弟融為冀州牧融將發堅祖於灞  
東奏樂賦詩堅母苟氏以融少子甚愛之比發三至灞  
上其夕又竊如融所內外莫知是夜堅寢於前殿太史  
令魏延上言天市南門屏內后妃星失明左右闇寺不  
見后妃移動之象堅推問知之驚曰天道與人何其不

遠遂重星官

載記

妖星見東井符堅末年妖星見於東井尹緯知堅將滅

乃與尹詳龐演推姚萇為盟主

載記

黃星出昴畢晉太元二十一年有大黃星出於昴畢之分五十餘日慕容氏太史王先曰當有真人起於燕代之間大兵鏘鏘其鋒不可當冬十一月黃星又見天下莫敵元魏太祖皇始元年也

魏書

鎮星在軒轅沮渠蒙遜聞劉裕滅姚泓顧謂左右曰古之行師不犯歲鎮所在姚氏舜後軒轅之苗裔也今鎮星在軒轅而裕滅之亦不能久守關中後劉裕子義貞

果敗於赫連勃勃焉

載記

熒惑失位初姚興死之前歲也太史奏熒惑在瓠瓜星  
中一夜忽然亡失不知所在或謂下入危亡之國將為  
童謡妖言而後行其灾禍太宗聞之驚乃召諸碩儒令  
與史官求其所詣崔浩對曰請以日辰推之庚午之夕  
辛未之朝天有陰雲熒惑之亡當在此二日之內庚之  
與未皆主於秦辛為西夷今姚興據咸陽是熒惑入秦  
矣諸人皆謂其無徵浩笑而不應後八十餘日熒惑果

出於東井留守盤旋秦中大旱明年姚興死二年交兵  
三年國滅於是諸人乃服曰非所及也

魏書

兵候太白廢帝之殞也沈攸之欲起兵問其知星人葛  
珂之珂之曰自古起兵皆諸侯太白太白見則成伏則  
皆桂陽以太白伏時舉兵一戰授首此近世明驗今蕭  
公廢昏立明政值太白時此與天合也且太白尋出東  
方東方利用兵西方不利故攸之止不反及後舉兵珂  
之又曰今歲星守南斗其國不可伐攸之不從遂敗

宋書

驛馬星流容城令徐路善占候世宗時坐事係冀州獄

別駕崔隆宗就禁慰問路曰昨夜驛馬星流計赦即時

應至隆宗先信之遂遣人試出城候焉俄而赦至時人

重之

後魏書

粹陽天庭元魏泰常四年自正月至秋七月月行酉犯  
太微天象若曰太微粹陽之天庭月者臣也今橫行輔

之不已甚乎

天象志

熒惑入南斗梁武帝中大通六年先是熒惑入南斗去

而復還留止六日上以諺曰熒惑入南斗天子下殿走  
乃跣足下殿以禳之及聞魏主西奔乃慙曰彼亦應天  
象耶本紀魏明問黃權天下鼎立何地為正對曰當驗天

蜀記

文往者熒惑守心而文帝崩吳蜀無事此其徵也

蜀記

熒惑入井傅奕隋開皇中以儀曹事漢王諒及諒舉兵

謂奕曰今茲熒惑入井是何祥也奕曰天上東井黃道

經其中正是熒惑行路所涉不為怪異若熒惑入地上

井是為灾也諒不悅及諒敗由是免誅

舊唐書

中星不守吳嶠嘗溪人煬帝元年過鄴中告其令曰中  
星不守太微主君有嫌而旺氣流萃於秦地子知之乎  
令不之信至神堯即位方知不誣嶠精明天文即袁天  
綱之師也

龍城錄

金玉床搖隋煬帝幸江都盜賊日滋夏侯端頗知玄象  
善相人說高祖曰金玉床搖動此帝座不安參墟得歲  
必有真人起於實沈之次天下方亂然安之者其在明

公

德星守秦分薛頤武德初進直秦王府密語曰德星守  
秦分王當有天下王表為太史丞

唐書

太白見秦分傳奕武德九年五月密奏太白見秦分秦  
王當有天下高祖以狀授太宗及太宗嗣位召奕賜之  
食謂曰汝前所奏幾累於我然今後但須盡言無以前  
事為慮也

舊唐書

星孛太微貞觀中太宗將封禪泰山有星孛于太微犯  
即位薛頤言考諸玄象恐未可東封褚遂良曰方告成

岱宗而望見此天意有所未合願加詳慮詔罷封禪

唐書

七星化人太宗時李淳風奏北斗七星當化為人明日

至西市飲酒使人候之有僧七人共飲酒二石太宗遣

人召之笑曰此必李淳風小兒在彼言我也忽不見

國史  
纂異

熒惑犯五諸侯長安二年熒惑犯五諸侯渾儀監尚獻

甫奏臣本命納音在金五諸侯太史之位熒惑火也能

尅金是臣將死之徵則天曰朕為卿禳之遽轉獻甫為

水衡都尉謂曰水能生金今又去太史之位卿無憂矣

其秋獻甫卒則天甚嗟異惜之

舊唐書

鎮犯天關長安四年熒惑入月鎮星犯天關嚴善思奏

曰法有亂臣伏罪臣下謀上之象歲餘張柬之敬暉等

起兵誅張易之昌宗五王立中宗

舊唐書

下人家飲酒章仇兼瓊領西川嘗令搜訪道術士有一  
鬻酒者不急於利每有紗帽藜杖四人來飲酒至數斗  
積至十餘石即併還之其言愛說孫思邈或報章仇公  
公專令探問忽一日又來公遂潛往從者三四人公至

前躍出再拜自稱姓名相顧徐起唯柴燼四枚在座前  
不復見矣時玄宗好道公奏其事詔召孫問之曰此太  
白酒星仙格絕高每遊人間飲酒處處皆至尤樂蜀中  
唐 速  
史 孫卒於永淳元年此云召孫問之何耶

北斗化永僧一行幼嘗有德於王姥兒殺人係獄姥求  
姥求救於一行一行乃徙大瓮於渾天寺中授布囊於  
二奴曰某坊廢園至昏當有七物入來可盡掩之酉後  
果有羣豕至奴悉獲之一行令寘瓮中玄宗急召一行

問曰太史奏昨夜北斗不見是何祥也師有一禳之乎  
一行曰后魏時失熒惑至令帝車不見古所無者天將  
大警於陛下也莫若大赦天下玄宗從之行歸放豕  
出又其夕太史奏北斗一星見凡七日而復

酉陽雜俎

星犯昴見素見肅宗於順化郡是歲十月丙申有星  
犯昴見素言於帝曰昴者胡也天道謫見所應在人祿  
山將死矣帝曰日月可知乎見素曰福應在德禍應在  
刑昴金忌火行當火位昴之晉中乃其時也既死其月

亦死其日明年正月甲寅祿山其殞乎帝曰賊何等死

荅曰五行之說子者視妻所生昴犯以丙申金木之妃

也木火之母也丙火為金子申亦金也二金本同未異

還以相尅賊殆為子與首亂者更相屠戮乎及祿山死

日月皆驗

新唐書按新舊書本紀祿山皆以乙卯死此云皆驗未審

熒惑守歲朱泚盜據京城李晟屯渭橋時熒惑守歲久

之方退賓介或勸曰今熒惑已退皇家之利也可速用

兵晟曰天子外次人臣但當死節垂象玄遠吾安知天

道耶至收復謂參佐曰前者士大夫勸晟出兵非敢拒  
也且軍可用之不可使知之嘗聞五緜盈縮無准晟懼  
復來守歲則我軍不戰而自潰矣參佐歎服皆曰非所  
及也

舊唐書

火金犯太微上將貞元十一年司天頻奏熒惑太白犯  
太微上將間一月而馬燧薨

舊唐書

太白犯上相元和八年太白犯上相歷執法占者言今  
之三相皆不利始輕末重月餘李絳以足疾免明十月

李吉甫以暴疾卒九年六月武元衡為盜所害

唐書

李吉

甫卒前一歲熒惑掩太微上相吉甫曰天且殺我

文星暗大中九年日官李景亮奏文星暗科場當有事

沈詢為禮部侍郎聞而憂焉至是三科盡覆試宏詞趙

矩等皆落吏部侍郎裴諗左授國子祭酒趙矩丞相令

狐綯故人子也同列將以諗賦題不密事嫁患於綯綯

遂令盡覆云

東觀  
奏記

木入南斗唐乾符中木入南斗數夕不退荊州節度王

鐸問知星者咸曰金火土犯斗即為災惟木當應為福耳術士邊岡以為惟斗帝王之宮宿惟木為福神木星入斗帝王之兆木在斗中朱字也后為全忠之應

北夢瑣言

五星連珠晉開運二年契丹主北歸脅陶穀令從行穀頗工厯數謂同輩曰西南五星連珠漢地當有王者出契丹主必不得歸國及耶律德光死有李光世指北穀曰自此契丹自相魚肉永不亂華矣遂歸漢

本傳

夢星墜懷蜀孟昶母李氏本長公主媵也嘗夢大星自

天墜落其懷以告公主公主曰此婢有福相當生貴子乃令知祥幸之遂生景

蜀精

夢立斗下袁郭初應舉夢立北斗下果第七人及第

外史  
榜机

伍喬星伍喬居廬山詩調清苦山中浮屠夢仰視見一大星芒色甚異傍有人指之曰此伍喬星也既覺訪得

喬乃傾資奉之使入金陵舉進士

陸游南  
唐書

吞飛星湯悅貴池人幼穎悟嘗見飛星墜水盤中掬吞之自是文思日竒仕南唐為宰相凡書檄詔誥皆出於

悅后隨其主歸宋為光祿卿

壽星圖嘉祐八年冬十一月京師有道人遊卜於市莫知所從來貌體古怪不與常類飲酒無算未嘗覺醉都人士異之相與誼傳好事者潛圖其狀後近侍達帝引見賜酒一石飲及七斗次日司天臺奏壽星臨帝座忽失道人所在仁宗嘉嘆久之閱世之所寫壽星圖不知其幾不過俯龜狎鶴松柏叅錯粉飾鮮麗而已仁宗時天下熙熙戮物不春宜乎壽星遊戲人間躬見於帝也

康節  
題

章聖二年有人長三尺許身首幾相半云云灌鑒記

南陵使者元豐八年春太史奏熒惑守心是時太清宮

道士王太初奏章於太一宮真室殿之中壇回云至九

天門下有傳上帝之命者曰已付南陵使者告行太初

因問曰南陵使者為誰答云見守心者是也自是京師

大火

文昌  
雜錄

天星不照宋宣和初蜀人王俊明在京師謂人曰汴都  
王氣盡矣吾夜以盆水直氐房下望之皆無一星照臨

汴分野者更於宣德門外密掘土二尺試取一塊嗅之  
枯燥索莫非復有生氣天星不照地脈又絕而為萬乘  
所都可乎即投匱上書乞移都洛陽

夷堅志

熒惑入天江宣和中熒惑入天江謝中美謂給事中許  
翰崧老云後三年都邑必大水至己亥夏大水莫知所  
由來幸新堤築成僅免魚鱉之患

鐵園山叢談

祭星曰布釋名曰星者散也言列位布散也爾雅曰祭  
星曰布注布散食地上取其象之布也

隕星為石左傳云隕石於宋五隕石也史記天官書曰  
星墮至地則石也河濟之間時有墜星

星徑百里大星徑百里中星五十小星三十北斗七星  
星間相去九千里皆在日月下其二陰星不見者相去

八千里也

徐整  
長思

罰星廣雅云熒惑謂之罰星杜牧孫子注云歲為善星  
不福無道火為罰星不罰有德

玉李星如玉李月上金波霧生猶縠河垂似帶

金樓  
子

河鼓謂之牽牛

爾雅 河鼓十二星在牽牛北故或名為牽牛

牽牛織女焦林大斗記云天河之西有星煌煌與參俱出謂之牽牛天河之東有星微微在氐之下謂之織女荆楚歲時記云嘗見道書云牽牛娶織女取天帝二萬錢備禮久不還被驅在營室又小說云天河之東有織女天帝之子也年年機杼勞役織成雲錦天衣容貌不暇整理天帝怜其獨處許嫁河西牽牛即嫁後遂廢織紝天帝怒焉責令歸河東但使其一年一度相會

羨杼古詩云迢迢牽牛星皎皎河漢女纖纖擢素手札  
札弄機杼終日不成章泣涕零如雨謝惠連七夕詩弄

杼不成藻聳轡驚前蹤

負輶古詩云南箕北有斗牽牛不負輶

架檻陸士衡擬古詩織女無機杼大梁不架檻

農祥國語號文公諫宣王曰太史順時峴土農祥晨正

土乃脈發韋昭曰農祥房星也

龍湫楚語曰觀射父對昭王曰日月會於龍湫土氣含

收天明昌作百嘉備舍國家於是乎蒸嘗賈達碗龍尾  
也月令孟冬日在尾

分野保章氏掌天星以志星辰日月之變動以觀天下  
之遷辨其吉凶以星土辨九州之地所封封域皆有分

星以觀妖祥

周禮

角亢氐兌州房心豫州尾箕幽州斗牽

牛婺女揚州虛危青州營室東壁并州奎婁胃徐州昴

畢冀州觜觿參益州東井鬼雍州柳七星張三河翼軫

荊州堪輿家云玄枵為齊之分星紀吳越之分析木之

津燕之分大火宋之分壽星鄭之分鶉尾楚之分鶉火  
周之分鶉首秦之分實沉魏之分火梁趙之分降婁魯  
之分訾娵衛之分

星主中國或曰分野獨擅於中華星次不霑於荒服豈  
日月私照與李淳風曰華夏為四交之中當二儀之正  
四夷炎涼氣偏鳥語獸心豈得同日而語故孔子曰夷  
狄云之亡此之謂也是故越裳重譯匈奴稽顙肅慎獻  
矢西戎聽律莫不航海梯山遠方致貢人畜內首殊類

宅心以此而言四夷宗中國之驗也故孔子曰為政以德云拱之且聖人觀象分配國野或取水土所生或視風氣所宜因係之以成形象之應故昴為旄頭被髮之象青丘蠻夷文身之國梗河胡騎負戈之俗胡人事天以昴星為主越人伺察以斗牛辨祥秦人占狼孤齊觀虛危各是其國自所宗奉是以聖人因其情性所感而分屬之豈苟然傳會者哉乙巳鄭樵通志畧云按天之所覆者廣而華夏所占者半女下十二國耳牛女在東

南故釋氏謂華夏為南贍部州其二十八宿所管者多十二國之分野隨其所隸耳文獻通考云以十二次言之牛女雖屬揚州而華夏之地所謂十二國者則不特揚州而已又揚州雖可言東南而牛女在天則北方宿也與南贍部州之說異矣且北斗七星其次舍自張而至於角星書以為一主秦二主楚三主梁四主吳五主趙六主燕七主齊五星其次舍在畢星書以為西北一星主秦東北一星主趙燕東南一星主魯衛中央

一星主楚西南一星主魏然則北斗五車所主者亦此十二國而此二星初未嘗屬乎牛女也謂牛女專主華夏可乎癸辛雜志云世以二十八宿配十二州分野最為踈誕中間僅以畢昴二星管異域諸國鄭夾漈云趙普有疏云五星二十八宿在中國而不在四夷此言信矣按此三書俱不及乙巳占何耶

宿字解釋名云宿宿也言星各止住其所也說苑辨物篇曰二十八星所謂宿者日月五星之所宿也王充論

衡云二十八宿為日月舍猶地有郵亭為長吏解矣晉天文志云四布於方各七為二十八舍觀此數公則宿止當讀如本音吳都賦窮飛走之棲宿叶披重霄而高狩借韻耳未可固執宿為秀音也史記律書註正義秀肅二音

行止異名凡星居之曰次曰舍曰留同舍曰合變為妖星曰散經之曰歷相擊曰鬪又曰離復合合復離為鬪早出曰羸晚出曰縮又失次上二三宿曰羸失次下二

三宿曰縮在下而上曰陵韋昭謂突掩為陵在上而下  
曰乘周匝曰繞東西曰鈎南北曰紀星月相陵曰食七  
寸以內光芒相反曰犯居其宿曰守守之而久曰復還曰

金鷄玉羊易是類謀曰當藏者出當出者消太山失金  
鷄西獄亡玉羊鄭玄云失金鷄者箕星玉羊者狼星  
弗劇秦美新大茀經竇海水羣飛善曰茀彗星也

井中視星自井中視星所見不過數星自立上以望則  
見始出也非明益也勢使然也私心井中也公心丘上

也尸

漢

金之散氣史記天官書曰漢者金之散氣其本曰水漢星多則多水少則旱

河精川德布精上為星河精上為天漢

河圖活地象

水氣天河水氣也精光轉運於天

詩箋

水精為天漢

靈憲

水精上浮星元氣之英漢水之精也氣發而升精華上

浮宛轉隨流名之曰天河一曰雲漢衆星出焉

物理論

天津爾雅曰析木謂之津箕斗之間漢津也郭璞注曰  
津漢津也箕龍尾斗南斗天漢之津梁劉炫云天漢即  
天河也天河在箕斗二星之間箕在東方木位斗在北  
方水位分析水木以箕星為隅隅河須津梁以渡故謂  
此次為析木之津也

從天轉地天河從北極分為兩頭至於南極其一經南  
中過其一經東井過河者天之水也隨天而轉入地下

過  
子  
抱朴

七月案戶大戴禮曰夏小正曰七月漢案戶漢天河也  
戶直戶也言正南北也

星孛及漢傳曰昭公四年星孛及漢水祥也賈逵解曰  
天漢水也或曰天河

渭水以象始皇都咸陽端門四達以則紫宮渭水貫都  
以象天河橋橋南渡以法牽牛三輔  
皇圖

天漢項羽封高帝為漢王帝不悅蕭何曰語曰天漢其  
稱甚美願大王王漢撫其民還定三秦天下河圖也

漢書

天河與海通舊說天河與海通近世有人居海渚者年八月有浮槎去來不失期人有奇志立飛閣於槎上多齋糧乘槎而去十餘月至一處有城郭狀屋舍甚嚴遙望宮中有織婦見一丈夫牽牛渚次飲之牽牛人乃驚問曰何由至此此人為說來意拜問此是何處荅曰君還至蜀都訪嚴君平則知之竟不及登岸因還至蜀問君平曰某年某月有客星犯牽牛宿計其年月正是此人到天河時也

博物志

榰機石漢武帝令張騫使大夏尋河源乘槎經月而至一處見城郭如州府室內有一女織又見一丈夫牽牛飲河騫問曰此是何處答曰可問嚴君平織女取榰機石與騫而還後至蜀問君平君平曰某年某月客星犯牛女榰機石為東方朔所識荆楚歲時記昔有一人尋河源見婦人浣沙以問之曰此天河也乃與一石而歸問嚴君平云此織女支機石也集林嚴遵仙槎唐置之於麟德殿長五十餘尺聲如銅鐵堅而不蠹李德裕截細枝尺

餘刻為道像往往飛去復來廣明以來失之槎亦飛去

洞天集元豐末有人攜支機石頭投進者廣可二斗許不

圓微峩而碧色天漢左界比斗經其上

南壁閣居綠

天漢素女謝端少喪父母為隣人所養年十七未婚後於海中得一大螺如斗許取貯瓮中每早至野還見有飲飯湯火端疑之於籬外窺見一少女從瓮中出至竈下燃火便入問之女答曰妾天漢中白水素女天帝哀卿孤貧恭順使我權相為守舍炊煮待卿取婦當還去

今無故相伺不宜復留今留此殼貯米穀可得不乏忽  
有風雨而去端得其米資其子孫

搜神記  
發蒙記

老公賜藥晉宋黃祖奉親至孝母病篤天漢明開有一

老公將小兒持箱自通即以兩丸藥賜母服之患頓消  
因以停宿夜中廳事上有五色氣際天琴歌清好祖往  
視之見坐帳裏四角及頂上各有一大珠形如鷄子明

彩炫燿

幽明錄

五帝墟夫雲漢自坤抵艮為地紀北斗自乾攜翼為天

綱其分野與帝車相直皆五帝墟也

唐志

鵲填烏鵲填河成橋而渡織女

淮南子

銀漢絳河天河謂之銀河銀漢河漢絳河明河李白詩

銀河倒瀉三石梁杜甫詩銀河倒列星古詩曰河漢清

且淺宋之間詩明河可望不可親願得乘槎一問津

銀灣銀浦許洞謂銀河為銀灣李賀謂為銀浦

鵲跖集

風

天地之使風者天地之使也

河圖記

萬物之首樂動聲儀云風者禮樂之始萬物之首

漂物管子曰風漂物者也風之所飄不避貴賤美惡宋

王風賦云楚王曰夫風者天地之氣溥暢而至不擇貴

賤高下而加焉樂動聲儀云風者禮樂之始萬物之首

噫氣南郭子綦曰大塊噫氣其名曰風是惟無作作則

萬竅怒號而獨不聞之寥寥乎

無根陰陽散為風風氣無根也

五經通義

陰陽怒淮南子曰天之偏氣怒者為風春秋元命苞曰

陰陽怒為風

太玄中精風涵太玄之中精故能動化百物而行乎天上風陰也而其發為陽

子華書

天之號令翼氏風角曰風者天之號令所以謹告人君者郎顗曰風者號令天之威怒蔡伯喈上封事曰風者天之號令所以教人也張良疏曰風為號令動物通氣四正四維風者陰陽亂氣激發而起者也猶人之內氣因喜怒哀樂激越而發也故春氣溫其風溫以和喜風

也夏氣盛其風燥以怒怒風也秋氣勁其風清以淒清  
風也冬氣實其風慘以烈固風也此四正之風也又有  
四維之風東北明庶庶物出幽入明也東南融風其道  
以長也西南清明百物備成也西北不周方潛藏也此  
八風者方土異氣徐疾不同和平則順違逆則凶非有  
使之者也氣積自然怒則飛沙揚礫發屋拔樹喜則不  
搖枝動草順物布氣天地之性自然之體也

物理論

八風易緯曰八節之風謂之八風立春條風至春分明

庶風至立夏清明風至夏至景風至立秋涼風至秋分  
閹閏風至立冬不周風至冬至廣莫風至春秋考異郵  
曰八風殺生以節翶翶風之為言萌也其立字虫動於  
几中者為風呂氏春秋曰何謂八風東北曰炎風一日融風  
東方曰滔風東南曰薰風南方曰巨風西南曰淒風西  
方曰颶風西北曰厲風北方曰寒風

喜氣怒氣黃帝風經曰調暢祥和天之喜氣也折揚奔  
厲天之怒氣也風者氣也得怒之氣則暴得喜之氣則

和得金之氣則涼得木之氣則溫得火之氣則炎得水之氣則烈

祥風黃帝占曰風不及地和緩而來謂之祥風符瑞圖曰祥風者瑞風也一名景風尸子述太平事云其風春為發生夏為長羸秋為方盛冬為安靜四氣和為通正謂之永風禮稽命徵曰出號令合民心則祥風至孝經援神契云德至八方則祥風至尚書大傳曰王者德及皇天則祥風起

五風女媧沒大庭氏之王有天下五風異色枚乘七發

曰衆芳芬鬱亂於五風

遁甲開

山圖

夢風得相黃帝夢大風吹天下之塵垢皆去寤而嘆曰  
風為號令執政者也垢去土后在也天下豈有姓風名  
后者哉於是依占而求之得風后於海隅登以為相

帝王

世紀

脯翼堯時厨中自生肉脯其薄如筵搖動則風生使食  
物寒而不臭名曰脯翼

世紀

解愠阜財舜作五絃之琴以歌南風歌曰南風之薰兮  
可以解吾民之愠兮南風之時兮可以阜吾民之財兮

世紀

協風國語史伯對鄭桓公曰虞幕能聽協風以成樂生  
物者也虢文公諫周宣王曰先時五日瞽告有協風至  
陸機詩協風旁駁陸雲詩協風應律

折蓋武王伐紂大風折蓋太公因折蓋之形而制曲蓋

古猶鴟

今注

雷電以風周公居東二年為詩以貽王名之曰鶴鶴秋  
大熟未獲天大雷電以風禾盡偃大木斯拔邦人大恐  
王與大夫盡弁以啓金縢之書乃得周公請代武王之  
說王執書以泣曰昔公勤勞王家唯予冲人弗及知今  
天動威以彰周公之德王出郊天乃雨反風禾則盡起

尚書  
金縢

別風韓詩外傳曰成王時越裳重譯而來朝日久矣天  
之不迅風疾雨也海不揚波也意者中國殆有聖人乎

尚書大傳曰天無烈風淫雨意中國有聖人乎文心雕龍云尚書大傳有別風淮雨帝王世紀云烈風淫雨別列淮淫字似潛移淫列義當而不竒淮別理乖而新異傳毅制誅已用淮雨固知愛奇之心古今一也

爰居避國語曰海鳥曰爰居止於魯國東門之外臧文仲使國人祭之展禽曰今茲海具有災乎夫廣川之鳥獸恒知而避其災也是歲也海多大風冬燠虞翻注曰是爰居之所避也賈逵注曰爰居雜縣也

六鷁退六鷁退飛過宋都風也

占老子將去周出關以升崑崙關令尹喜占風逆知當有神人來過乃歸道見老子老子知喜命應得道乃停關下以長生之事授之

傳神仙

襄齊殿庶女者齊之寡婦養姑女利母財而殺母以告寡婦婦不能自解以寃告天大風襲於齊殿

史記

御風列子御風常以立春歸於八荒立秋遊乎風穴是風至則草木發生去則搖落謂之離合風

陸機要覽列子曰

列子師老商氏友伯高子進二子之道乘風而歸莊子  
曰列子御風冷然旬有五日而後返

蕭蕭荆軻入秦燕太子丹送別易水上歌曰風蕭蕭兮  
易水寒壯士一去兮不復還楚辭秋風濶以蕭蕭史  
記

雄風雌風楚襄王遊於蘭臺之宮宋玉景差侍有風颯  
然而至王乃披襟而當之曰快哉此風寡人所與庶人  
共者耶宋玉對曰此獨大王之風耳庶人安得共之夫  
風入於深宮經於洞房清清冷冷愈病析醒發明耳目

寧體便人此謂大王之雄風夫庶人之風墮然起於窮  
巷之間動沙砾吹死灰敝憊憊邑殿溫致濕此謂庶人  
之雌風也

以鵲占風孝武坐未央前殿天新雨東方朔屈指獨語  
上問之對曰殿後柏上有鵲立枝上東向而鳴視之果  
然問朔何以知之對曰此以人事知之風從東方來鵲  
尾長傍風則順背風則蹶必當順風而立是以知也

朔傳

李孝貞詠散東立朝雨霽南飛夜月明

避風臺拾遺記云漢成帝與趙飛燕戲於太液池每輕  
風時至飛燕殆欲隨風入水帝以翠纓結飛燕之裾今  
太液池尚有避風臺即飛燕結裾之處楊妃外傳云明  
皇覽漢成帝外傳以趙飛燕身輕置七寶避風臺謂妃  
子曰爾則任吹多少妃子對曰霓裳一曲足以高掩前世  
鄭公風射的山南有白鶴山此鶴為仙人取箭漢太尉  
鄭弘嘗採薪得一遺箭頃有人覓弘還之間何所欲弘  
識其神人也常患若邪溪載薪為難願旦南風暮北風

後果然故若邪溪風至今猶然呼為鄭公風也

孔靈符會稽記

手指葛玄行過神廟乘車不下須臾有大風逐玄埃塵

漲天玄大怒曰小邪敢爾即舉手指風風便止

神仙傳

少女風管輶過清河倪太守時天旱倪問輶雨期輶曰  
今夕當雨樹上已有少女微風樹間又少男風起衆鳥  
和鳴其應至矣須臾雨至

別傳劉孝威詩電舒長男氣枝

搖少女風

扇蔽庾亮出鎮江州以帝舅故內執朝權王導不能平

時王在冶城坐大風揚塵王輒舉扇拂塵曰元規塵汙人世說

仁風晉陽秋曰袁宏為東郡守謝安執宏手授扇宏曰謹當奉揚仁風慰彼黎庶

清風謝安云小時在殿廷會見王丞相便覺清風來拂人青鳥啣符吳真君嘗遇大風書符置屋上有青鳥啣去

風即止

續仙傳

司風令史明帝體肥憎風夏月常着小皮衣拜左右二

人為司風令史風起方面輒先起聞

宋書

長風宋書曰宗慤字元幹少時從父徵士炳問其志答曰願乘長風破萬里浪 高唐賦曰長風至而波起西京賦長風激於別隣起洪濤而揚波江賦長風颺以增扇

小人風齊神武時芒山之役風從西來入營李業興曰小人風來當大勝神武曰若勝以爾為本州刺史後果

驗北  
史

跋扈將軍隋煬帝泛舟忽陰風波嘆曰此風可謂跋扈

將軍

清異  
銀

如焚侯君集平高昌之後太宗欲以其地為郡縣褚遂良曰高昌塗路沙磧千里冬風冰冽夏風如焚行人遇

之多死

貞觀  
政要

勝風山人包超明皇令隨哥舒翰西征每陣常得勝風

西陽  
雜俎

翼二起風蕭志忠景雲元年為晉州刺史將以臘日畋

遊先一日有樵者於霍山見一長人向谷長嘯俄有兕鹿豕狐兔雉鴈駢匝百許長人曰余玄冥使者奉北帝之命明日蕭使君當畋汝輩若干合鷹死若干合箭死羣獸皆戰懼請命有老麋屈膝求救使者曰東谷嚴四善謀可就彼祈求羣獸從行樵者覘之至東谷有黃冠一人老麋哀請黃冠曰若祈勝六降雪巽二起風即蕭使君不復遊獵矣昨勝六喪偶得美女納之雪立降矣巽二好飲酒得醇醪賄之則風立生有二狐自稱能取

之羣獸散去翌日未明風雪暴至竟日乃罷蕭使君不

復獵矣

幽怪錄

銀瓶止風天寶時一日大風卒起詔不空禳止請銀瓶一枚作法加持須臾戢靜忽因池鷁悞觸瓶傾其風又作急暴過前勅令再止隨止隨効帝乃賜號曰知藏焉

宋高僧傳

封十八姨天寶中崔元微春時月夜於苑中見青衣女伴曰楊氏李氏陶氏又緋衣小女曰石醑醑忽報封家

十八姨來言辭冷冷有林下風韻醋曰女伴在苑中每被惡風相撓常求十八姨相庇處士每歲旦作一朱幡上圖日月五星之文於二月一日平旦微有東風立於苑東則免難矣崔明年至此日立幡是日東風刮地折木飛花而苑中繁花不動崔始悟女伴即衆花之精封家姨乃風神也

博異記

占風鐸唐岐王宮中於竹林內懸碎玉片子每夜聞玉片子相觸之聲即知有風號占風鐸

開元遺事

相風旌五王宮中各於庭中立長竿掛五色旌於竿頭  
旌之四垂綴以小金鈴有聲即使侍從者視旌之所向  
可以知四方風候

開元遺事

詠薰風柳公權侍文宗遊後庭聯句帝曰人皆苦炎熱  
我愛夏日長柳曰薰風自南來殿閣生微涼

本傳

貪狼風前蜀王衍咸寧元年十月幸秦州至梓橦大風  
發屋拔木太史曰此貪狼風也當有敗軍殺將者衍不  
省至綿谷而唐師入其境衍懼遽還唐師所至州縣俱

迎降

東方生風東者日之初風者教之始天之使也所以發號施令故生自東方也景霽山昏蒼埃際合崖谷若一巖岫之風也黃白昏埃晚空如堵獨見天垂川澤之風也加以黃黑白埃承下山澤之猛風也

內經五運行論

鳴素啟

折風之化也振拉摧拔風之用也

上

風師呂氏春秋曰風師曰飛廉應劭云飛廉神禽能致風氣者也楚詞後飛廉使奔屬風俗通云周禮以柳箕

祀風師風師者箕星也箕主簸揚能致風氣易翼為長女長者伯也故曰風伯戌之神為風伯故以丙戌日祀於西北火勝金為木相也晉天文志曰箕一名天鷄主八風凡日月宿在箕壁軫翼者風起孫子火攻之法曰起火有日月者月在箕畢軫翼也四宿者風起之日也春秋締曰月失其行離于箕者風揚沙郊祀志注師古曰風伯飛廉雨師屏翳也說者謂為箕畢星志既言二十八宿又有風伯雨師則知非箕畢也風伯名方道彰七

磔爾雅云祭風曰磔孫炎云既祭披磔其牲以風散之  
李巡曰祭風以牲頭蹄及皮破之以祭故曰磔郭璞曰  
今俗當大道中磔狗云以止風此其象云

羊角莊子曰鵬之背若太山鵬翼若垂天之雲搖羊角  
而上者九萬里絕雲氣負青天司馬注羊角風曲上行  
若羊角駱賓王啟搏羊角以垂天展驥足而騰景王勃  
啓牛蹄已倦臨大壑而驤鱗羊角可逢想高衝而撫翼  
異名爾雅云南風曰凱風詩卽風凱自南東風曰谷風卽風習

谷

北風謂之涼風

卿風北風其涼

西風謂之秦風

大雅大風有隧

焚輪

謂之頽

郭曰暴風從上下小雅惟風及頽

從上下曰飈

說文飈疾風也

亦曰扶

搖迴風

楚詞悲迴風

曰飄日出而風曰暴陰而風曰曠風而

雨土曰霾

月令云疾風曰育風風俗通曰猛風曰颶風而

風曰濁微風曰飈小風曰颸小風

從孔來曰飈

不鳴條

儒者論太平瑞應皆言五日一風風不鳴條

董仲舒云太平之世風不搖條開甲破萌而已

西京雜記論衡

太

平時陰陽和風雨咸同海內不偏地有險易故風有遲

疾雖太平之政猶有不能均同也唯平均乃不鳴條易

稽

覽圖

君子風風或清明來久長不搖樹木枝葉離地三二丈者此有龍德在於下風或清明不及二三尺者此君子之風也

風俗通

高下風高者道遠下者道近凡大風非常三日三夜者天下盡風也二日二夜者天下半風也一日一夜者千里風也

抱朴子

疾遲凡風動初遲後疾其來遠初急後緩其發近凡風  
動葉十里鳴條百里搖枝二百里墮葉三百里折小枝  
四百里折大枝五百里飛沙石千里拔大樹根五千里  
凡鳴條以上皆百里風也

乙巳占

鳥巢扶枝鳥鵲識歲之多風去喬木而巢扶枝注扶旁  
也

淮南子

鳥向風立魚逆水而上鳥向風而立取其鱗羽之順也有微風不知所從來但觀鳥之所向

瑣碎錄

酒沈溢淮南子曰物類之相應玄妙深微論辯不能解故東風至而酒沈溢造化權輿云以為東方之氣風也故凍非東風不能解湛非東風不能溢

虎嘯春秋元命苞曰猛虎嘯谷風起類相動也淮南子曰虎嘯而谷風至注虎陽獸也與風類同成公綏嘯賦云飛廉皷於幽隧猛虎應於中谷

鳶鳴前有塵埃則載鳴鳶注鳶鳴則風生

禮記

惠風魏都賦惠風如薰邊讓章華臺賦曰惠風春施謝

混游西池詩云惠風蕩繁圃呂向曰春風也晉袁羊曰  
何嘗見明鏡疲於屢照清流憚於惠風

光風招魂云光風轉惠汜崇蘭此注光風謂雨已日出  
而風草木有光也

緒風楚詞款秋冬之緒風注云緒餘也謝靈運詩初景  
革緒風新陽改故陰顏延年和謝詩云倚巖聽緒風

厲風莊子云冷風則小和飄則則大和厲風濟則衆竅  
為虛而獨不見之調調之刀刀乎注泠泠小風厲風大

風也

獵葉風周生列子曰夫獵葉之風不應八節

石尤風宋孝武帝丁督護歌云願作石尤風四面斷行  
旅陳子昂入峽阻風云故鄉今日友歡會坐應同寧知  
巴峽路辛苦石尤風戴叔倫贈裴明州詩知得未得去  
慚愧石尤風郎士元留盧秦卿詩知有前期在難分此  
夜中無將故人酒不及石尤風李義山詩來風貯石郵  
香風王子年拾遺記曰瀛洲時有香風冷然而起張袖

受之則歷年不歇着肌膚必軟滑

祛塵風崑崙山有四面風者言東南西北一時俱起也  
又有祛塵之風若衣服塵污者風至吹之衣則淨如浣

濯

落梅風五月有落梅風江淮以為信風又有霖霪號為

梅雨沾衣服皆敗

風土記

黃雀風南中六月則有東南長風俗號黃雀風時海魚

化為黃雀因為名也

風土記

鯉魚風提要錄鯉魚風乃九月風也李賀詩門前流水江陵道鯉魚風起芙蓉老又古詞云瑞霞成綺映舴艋鯉魚風起

信風江淮船泝流而上常待東北風謂之信風七八月

有上信三月有鳥信五月有麥信

國史補

花信風徐鍇歲時記云三月花開名花信風東臯雜錄江南自初春至初夏五日一番風候謂之花信風梅花風最先棟花風最後凡二十四番以為寒絕也后詩人

詩云棟花開後風光好梅子黃時雨意濃徐師川詩云  
一百五日寒食雨二十四番花信風又古詩云早禾映  
雨初晴后苦棟花風吹日長

颶風嶺南錄云嶺裔秋夏雄風曰颶發自午至夜半乃  
止仆屋僵樹甚者颶屋瓦若飛蝶累年一發或歲再三  
南越志云熙安間多颶風颶者具四面之風也一曰具  
風常以六七月發未至時三日鷄犬為之不寧大者或  
至七日小者一二日外國以為黑風嶺表錄異云南海

秋夏間或雲物慄然有暉如虹長六七尺此候則颶風必發故呼為颶母見忽有震雷則颶風不作矣舟人嘗以為候預為備之番禺雜記云颶風將作有微風細雨先緩後急謂之鍊風

舶艤風吳中梅雨初過颶然清風而至彌旬謂之舶艤風此番商客海舶初回風送而至銀碎吳中每暑月則

東南風數日甚者至踰旬而止吳人名之曰舶趨風云海外舶船禱於神而得之乘此風到浙江間也東坡吳

中詩云三旬已過黃梅雨萬里初來舶趠風

唐溪詩話

古風發屋折木者曰怒風揚沙轉石者曰狂風四轉五復者曰亂風暴風卒起乍有乍無者曰暴風獨鹿蓬勃者曰勃風扶搖羊角者曰飄風風來清涼溫和塵埃不起者曰和風

乙巳占

四方風南越志云熙安界多風俗號為四方之風

五風信吳俗以十月初五日為五風生日太湖漁者千餘家盛陳牲醴饗並湖諸神祠祈此日有風則每五日

風雨如期而至終歲皆然可以揚帆取魚謂之五風信  
海風海道之險曰癡風曰黑風癡風之作連日怒號不  
已四方莫辨黑風則天色晦冥不分晝夜

圖經

俊風正月時有俊風俊者大也大風南風也何大於南  
風也曰合冰必於南風解冰必於南風生必於南風收  
必於南風故大之也

大戴禮

剛風鶴鳶展翅不能動去地四十里風力猛壯可驗有

剛風世界

抱朴子

風山北屋縣故城西十里有風山其山有穴如輪風氣蕭索常不止

風門山風門山有石門去地百餘丈將欲風起此門隱隱有黑氣上須臾有黑風竟天

武陵記

風母風母出九德縣似猿見人若慚出頸打殺得風還

活劉欣期  
交洲記

風井盛弘之荊州記曰宜都恨山縣山有風穴口大數尺名曰風井夏則風出冬則風入風出入之時吹拂左

右常淨暑月經之凜然有衣裘想袁山松云夏則風出  
冬則風入春秋分則靜余往觀之其時四月去穴數數  
丈須臾寒慄言至六月中尤不可當往人有冬過者置  
笠穴中風吸之經日還步陽溪得其笠則知潛通矣

水經

風穴龍山石上往往有仙人及龍迹故以為名四麓各  
有一大穴大如車輪春則風生東秋出西夏出南冬出  
北不相奪倫有沙門法猛於夏日入其東穴見石屋石  
人欲窮諸穴便見有人厲聲云法師其餘皆如東者不

宜來見穢猛乃愕然不覺身在穴外

邢子勵  
地記

犬自穴出汝南臨汝縣有小山曰崆峒其顛洞穴如盃將有大風雨則白犬自穴出田夫以為候亦名曰玉燭

峯

三水  
小牘

見雲知風白崖山之右有巨穴如井不知淺深穴口四圍津津如汗間有氣出騰空為白雲須臾風起怒號如雷里人見雲即知風氣散則風定細則風小盛則風猛窒其穴風雖少而民多瘴開則風如故而瘴亦衰

風輪子華子云棲三陰之正氣於風輪其專精之名曰太玄寶積經云有風輪名清涼能使一雲普覆三千大千世界

三種風輪難陀苑中自然有三種風輪曰開曰淨曰吹開者有風來開苑諸門淨者有風輪來掃除其地今皆清淨順者有風輪來吹諸華樹令花布散

經世

山獵法獄之山有獸其名曰山獵暉其行如風見則天

下大風

山海經

折丹大荒之中有山曰鞠陵焉山有人名曰折丹處東  
極以出入風折丹神人也

山海經

蓬蓬風謂蛇曰予蓬蓬然起於北海而入於南海也夫  
折大木飛大屋者惟我能也

莊子秋水

嫋嫋九歌曰嫋嫋兮秋風洞庭波兮木葉下謝靈運詩  
嫋嫋秋風過湯惠休白紵歌秋風嫋嫋入曲房

瑟瑟劉公幹贈從弟詩亭亭山上松瑟瑟谷中風  
獵獵鮑明遠還都詩鱗鱗夕雲起獵獵晚風道

鯨魚報風扶南之西海裏有山週迴千里有大石名為  
海彭瀾可百里海神欲為風暴動但先聞此石震響如  
雷則鯨便起而風也

扶南傳

高沙洞朝鮮慶尚道清道郡南二里有鰲山東有一谷  
名曰高沙洞天將風雨先期而鳴噴出雲氣雲入洞內  
則雨雲出洞外則風大鳴則即日有驗小鳴則三二日  
乃驗

志

相風帝與娥皇汎於海上以桂枝為表結芳茅為旗刻

玉為鳩置與表端言知四時之候今之相風此遺像也

王子年  
拾遺記

相風鳥長安南有靈臺高十仞上有銅渾天儀又有相

風銅鳥或云遇千里風乃動

郭緣生  
述征記

雷

天鼓河圖帝通紀曰雷天之鼓也

抱朴子同

陰陽合春秋元命苞曰陰陽合為雷曾子曰陰陽之氣俱則為雷楊泉物理論曰積風成雷

陰陽相薄陰陽相薄感而為雷激而為霆

穀梁

說文霆

雷餘聲也鈴鈴所以挺出萬物震勞歷萬物者

徐鉉云  
別作靂

非 露五經通義震與霆皆霹靂也東京賦霹靂激而增響

前天文志辟歷夜明晉書楚王璋傳大風雷雨辟礪

天地長子雷於天地為長子以其首長萬物與其出入

也陽用事百八十三日而終陰用事亦百八十三日而

終雷二月出地百八十三日雷出則萬物出八月入地

百八十三日雷入則萬物入此其常經也故雷安萬物

安雷害萬物害猶國也君安國亦安君害國亦害

洪範論

人君之象於易雷以二月出其卦曰豫言萬物隨雷出

地皆逸豫也以八月入其卦曰歸妹言雷復歸入地則

孕毓根核保藏蟄蟲避盛陰之害出地則養長華實發

楊隱伏宣盛陽之德入能除害出能興利人君之象也

五行傳雷以十一月起黃鍾二月大聲八月閉藏

京房占

辟陰除害孔子云雷之始發大壯始君弱臣強從解起雷者所以開發萌芽辟陰除害萬物須雷而解資雨而

潤故經曰雷以動之雨以潤之王者崇寬大順春令則雷應節不則發動於冬當震反潛故易傳曰當雷不雷

太陽弱也

後漢郎顗傳

號令卽顗曰雷者號令其德生養

出滯號文公諫周宣王曰陰陽分布震雷出滯

國語

拒難折衝五星占云雷電殺人何雷天拒難折衝之臣

也君承用節度卽雷以節暴人威福則雷電殺人

京房易傳

大陽激氣雷者太陽之激氣也正月陽動故正月始雷

五月陽盛故五月雷迅秋冬陽衰故秋冬雷潛盛夏之時太陽用事陰氣乘之陰陽分爭則相校軫校軫則激射激射為毒中人輒死中木木折中屋屋壞人在木下屋間偶中而死矣

論衡

震驚百里論語讖曰雷震百里聲相附宋均注曰雷動百里故因以制國也雷聲為諸侯之政教所至相附近也酈炎對事曰或曰雷震驚百里何以知之炎曰以其數知之夫陽動為九其數三十六陰靜為八其數三十

二一陽動二陰從故曰百里論衡云千里不同風百里不共雷

藏冰棄冰凡藏冰以時則雷出不震棄冰不用則雷不發而震

左傳

陽聲雷者陽聲出非其時臣竊君柄之象

唐五代志

天怒論衡曰世名雷電為天怒隆隆之聲天怒之音吳武陵遺孟簡書曰古稱一世三十年子厚之斥十二年殆半世矣霆碎電射天怒也不能終朝聖人在上安有

畢世而怒人臣耶

雄雷雌雷春雷初起其音洛洛霹靂者所謂雄雷旱氣也其鳴依依音不大霹靂者謂之雌雷水氣也

師曠

軒轅星軒轅星主雷雨之神

春秋合城圖

雷君雷君出裝隱隱西行霖雨不止流為江河

易林變占

雷公圖畫之工圖雷之狀颯颯如連鼓形又圖一人若力士謂之雷公使之左手引連鼓右手椎之

論衡雷公江

赫冲

道經

黃帝雷精黃帝以雷精起

河圖

塗山雷震禹會塗山之夕大風雷震有甲步卒千餘人其不被甲者以紅綃帕抹其額自此遂為軍儀之服一儀

寶錄

射天震死帝武乙無道為偶人謂之天神與之博令人為行天神不勝乃僇辱之為革囊盛血仰而射之命曰射天武乙獵於河渭之間暴雷武乙震死史記

震乘武王伐紂雨甚雷疾武王之乘雷震而死周公曰

天不祐周矣太公曰君秉德而受之不可如何也

六  
韜

雷電以風尚書大傳云周公薨成王欲葬之於成周天乃雷電以風未即盡偃大木斯拔周人大恐王葬周公於畢示不敢臣也張良疏云昔周公葬不如禮天乃動威

雷師穆天子傳云吉日辛酉天子升崑崙之丘以觀黃帝之宮而封豐隆之葬以詔後世郭璞云豐隆筮師御雲得大壯卦遂為雷師淮南子曰季春三月豐隆乃出

以將其雨張衡思玄賦云豐隆軒其震霆雲師魁以交  
集抱朴子云故聾聾在乎形器則不信豐隆之與玄象  
矣玉樞經雷師皓翁悉力雷司委心火部

雷神隨擊東海上有勇士曰苗丘訢以勇遊於天下過  
神淵飲馬馬沉訢去朝服拔劍而入三日三夜殺二蛟  
龍而出雷神隨而擊之十日十夜眇其左目

韓詩外傳

擊齊臺淮南子曰庶女呌天雷電下擊景公臺墮支體  
傷折海水大出許慎註云庶賤之女齊之寡婦無子不

嫁事姑謹敬無男有女女利母財令母嫁婦婦終不肯  
女殺母以誣寡婦婦不能自明冤結呌天天為作雷電  
下擊景公之墓墮壞也毀景公之支體海水為之大溢  
出也

震廟九月己卯晦震夷伯之廟罪之也於是展氏有隱  
慝焉左傳十五

感雷而生子路感雷精而生尚剛好勇親涉衛難結纓  
而死孔子聞而覆醢每聞雷鳴乃中心惻怛故後人忌

金少川卷二  
馬以為常也

論語

雷火化雀秦穆公出狩天震大雷下有火化為白雀銜

丹書集公車曰秦伯霸

尚書  
中候

無雲而雷史記秦二世元年天無雲而雷劉向以為雷當託於雲猶君託臣陰陽之合也二世不恤天下萬民有怨畔之心是歲陳勝起天下畔趙高作亂秦遂以亡一

曰易震為雷為貌不恭也

前漢書

母畏雷蔡順母平生畏雷自亡後每有雷震順奔塚泣

曰順在此

汝南先賢傳

晉書王裒孝子傳竺彌伏父墳泣同

避雷室湖陽縣春秋蓼國樊重之邑也重母畏雷為石

室避之悉以文石為塔砌今猶存

盛弘之  
荊州記

辨誣河南李叔卿為功曹應舉孝廉同時應者害之使

婢宣言叔卿淫其寡妹其妹傷被淫之名遂到府門自

殺叔卿亦自殺明已無憊也後三年霹靂害叔卿者以

屍置叔卿塚前其家收而葬之秋又震發其塚

列女  
后傳

失匕箸曹公從容謂先主曰天下英雄唯使君與操本

初之徒不足數也先主方食失匕箸會雷大震先主曰聖人言迅雷風烈必變良有以也一震乃可致此

華陽國志

虎銜曹爽夢二虎銜雷公若二升椀放着庭中以問占者馬訓曰憂兵訓退告妻曰爽將以兵亡不出旬日

世語

遇震不驚世說云夏侯太初嘗倚柱作書時大雨霹靂破所倚柱衣服焦然神色無變書亦如故賓客左右皆跌蕩不得住曹嘉之晉紀作諸葛誕語林云夏侯太初從魏帝拜陵陪列於松柏下時暴雨霹靂正中所立之樹冠冕焦

壞左右覩之皆伏太初顏色不改

滅榮緒亦

作諸葛誕載記劉曜

年八歲從元海獵於西山遇雨止樹下雷震樹旁人莫

不顛仆曜神色自若元海異之曰此吾家千里駒也

寢柏移災王丞相令郭璞試作一卦卦成郭意色甚惡  
云公有震厄王問有可消伏理不郭曰命駕西出數里  
得一柏樹截斷如公長置床上常寢處災可消矣王從  
其語數日中果震柏粉碎子弟皆稱慶大將軍云君乃  
復委罪於樹木世說

雷車義興人姓周永和中出都日暮道邊有一新草小屋有一女出門望見周曰日已暮前村尚遠臨賀詎得至周便求寄宿向一更中聞外有小兒喚阿香官喚汝

推雷車女乃辭去明朝視宿處乃見一新塚後五年果

作臨賀太守續 捷  
神記柳公權嘗見親故說元和末止建州

山寺中夜半覺門外喧鬧因潛於牕櫺中觀之見數人

運斤造雷車如圖畫者

西陽  
雜俎

白日揚光雷車避藏

易林

雷神墮地晉扶風楊道和夏于田中值雷雨至桑下霹

震下擊之道和以鋤格折其肱遂落地不得去色如丹  
目如鏡毛角長三尺餘狀如六畜頭似彌猴

神記

震惡佛佛虜凶虐暴忍常自言國名佛佛則是佛中之  
佛尋被震死既葬又震出之題皆四字表其凶逆

興光

震齋棟齊永明十一年三月震於東齋棟崩左右密欲  
治繕竟陵王子良曰此豈可治留之志吾過且旌天之

愛我也明年子良薨

南齊書

擊大航顧協為通事舍人大通二年震擊大航然盡建

康縣馳啓協以為非吉祥未即呈聞后帝知之曰寔之所擊一本罰惡龍二彰朕之有過協掩惡揚善非曰忠公由是見免南史

霹靂鬪神武嘗閱馬於北牧道逢暴雨大雷電震地前有浮圖一所神武令薛孤延唱殺繞浮圖走火按稍直前未至三十步震燒浮圖孤延唱殺繞浮圖走火遂滅孤延還眉鬚及馬鬢尾皆焦神武嘆其勇決曰薛孤延乃能與霹靂鬪北齊書

雷卵牙門將陳義即雷之諸孫昔陳氏因雷雨晝冥庭  
中得大卵覆之數月卵破有嬰兒出焉自後日有雷扣  
擊戶庭入其室中就於兒所似若乳哺者歲餘兒能食  
乃不復至遂以為己子義即卵中兒也

投荒  
雜記

丁謂撰記

云舊記云雷欽州南七里有擎水雷今南渡是也始者  
里民陳氏家無子因射獵中獲一大卵圍及尺餘攜歸  
家不知其何名忽一日霹靂而開遽生一子鞠育撫養  
遂成其家鄉俗異之曰雷種陳天建二年也

雷公夾樹唐代州西十餘里有大槐震雷所擊中裂數丈雷公夾於樹間吼如霆震時狄仁傑為都督賓從往觀衆皆披靡無敢進者仁傑單騎逕進迫而問之乃云樹有乖龍所由令我逐之落勢不堪為樹所夾若相救者當厚報德仁傑命鋸匠破樹方得出其後吉凶必先報命

分地界開元中漳泉二州分疆界不均互訟于臺省制使不能斷者數年一日忽大雷雨霹靂一聲崖壁中裂

所競之地拓為一逕因為官道壁中有方篆六行二十四字皆廣數尺人莫能識貞元初流人李協辯之曰漳泉兩州分地太平永安龍溪山高氣清千年不惑萬古作程所云永安龍溪者兩郡界首鄉名也

漳泉故事  
錄異記

方士致雷玄宗嘗冬月召山人包超令致雷聲超對曰來日及午有雷遂令高力士監之一夕醮式作法及明至已矣天無纖翳力士懼之超曰將軍視南山當有黑氣如盤矣力士望之如其言有頃風起黑氣彌漫疾雷

數聲

酉陽雜俎

霹靂車李廓在北都介休縣百姓送解牒夜止晉祠宇  
下夜半有人叩門云介休王暫借霹靂車某日至介休  
收麥良久見數人共持一物如幢扛上環綴旗幡其幡

凡二十八葉每葉有光如電起以授之百姓遍報鄰村  
村人悉不信其日介山上有雲氣蔽天注雨如綆風吼

雷震凡損麥千餘頃數村以民為妖訟之

酉陽雜俎

雷公形貞元四年宣州忽大雷雨一物墮地猪首手足

各兩指執一赤蛇啮之俄頃雲暗而失時皆圖而傳之

酉陽雜俎

雷州春夏多雷無日無之秋日則伏地中其狀如

蠶人取而食之

國史補

嘗有雷民因大雷電空中有物承

首鱗身狀甚異民揮刀以斬其物踣地血流道中而震

雷益厲其夕凌空而去自後揮刀民居屋頻為天火所

災雷民圖雷以祀者皆承首鱗身也

投荒雜錄

震林甫元和元年六月惠州一娼女震死於市衢脇下

有朱字云李林甫以毒雲弄正權帝命震死

龍城錄

震逆臣宮元和中李師道據青齊不貢不覲憲宗命將討之王師不利而師道益驕乃建新宮擬天子正衙卜日而居是夕雲物遽晦風雨如撼遂為震擊傾圮俄復繼以天火了無遺者青齊人相顧語曰人臣逆君謫見於天安可逃其戾乎旬餘師道果誅死

宣室志

震寺刹蕭澦初至遂州造二旛刹施於寺齋慶畢作樂

忽暴雷震裂併成數十片至來歲雷震日澀死

酉陽雜俎

瓦列梁上元稹在江夏襄州賈塹有庄新起堂上梁纔

畢疾風甚雨時庄客輸油六七瓮忽震一聲油瓮悉列  
於梁上一滴不漏其年元卒

酉陽雜俎

劈山填石東陽郡濱於浙江有山周數百里江水曲而  
環焉遷滯舟楫人頗病之常侍敬昕太和中出守其山  
一夕雲物曠晦暴風雷電動蕩室廬江水騰溢莫不惶  
惑迨曉方霽人往視之已劈而中分相遠數百步引江  
流直而貫焉其環曲處悉填以石遂無縈繞之患

宣室志

兄弟五人葉遷韶曾避雨救雷公於夾樹間翌日雷公

以墨篆一卷與之曰依此可致雷雨祛疾苦立功救人  
我兄弟五人要聞雷聲但喚雷二雷五性剛躁無危急  
之事不可喚之自是行符致雨咸有殊効嘗醉於吉州  
為太守所辱乃大呼雷五時郡中亢旱忽震霹暴作太  
守下階禮接請為致雨信宿霑足因為遠近所傳

神仙感應傳

雷神移床吳柴再用為光州一日大震雷家人皆伏匿  
再用當戶危坐不動俄見有襦袴四人舁再用坐敗床  
出庭中復大震屋折有龍出

九國志

雷公籙巴蜀間於高山頂或潔地建天公壇祈水旱蓋開元中上帝所降儀法以示人也其壇或牛羊所犯及預齋者飲酒食肉多為震死新繁人王堯因往別業村民烹豚待之有一人自天公齋廻乃即席食肉王謂曰爾不懼雷霆耶曰我與雷為兄弟何懼之有王異之乃詰其所謂曰我受雷公籙與雷同職因取其籙驗之果如其說仍有數卷或畫壯夫以拳杖地為井號拳杖井或畫一士負薪杵號一谷柴或以七手撮出簸之號七

山簸江陵東村李道士舍亦有此籙云玉洞法籙此夢瑞言

誤擊江西村中有人震死既而空中呼曰誤矣可作蚯

蚓爛擣腹臍中當差如言擣之遂癒

稽神錄

擊妬閨王延翰忠懿王審知子也妻博陵崔氏性悍妬殘忍嘗以練縛姬侍而鞭之練染血赤乃止又置木掌

擗人一旦盛暑天無纖雲而霆震擊斃於中庭或者曰

忠懿暴終博陵之鳩故也

五國故事

擊章惇章惇徽宗時貶雷州司戶卒後欽宗北狩至檀

州雷擊民間一男子背上朱書賊臣章惇

南燼錄

雷公墨雷州之西有雷公廟彼中百姓每年配納雷鼓雷車人有以黃魚、彘肉同食者立遭雷震人皆敬而憚之每大雷雨後人多於野中拾得鱉石謂之雷公墨扣之鎗然光瑩如漆又於霹靂處或土木中得楔如斧者謂之霹靂楔與小兒珮帶皆辟驚邪與孕婦磨服為催生藥皆有應驗嶺表錄異凡訟者投牒必以雷墨雜常墨書

之為利

提荒  
雜錄

霹靂磧玉門之西有一國國中有山山上有祠廟國人歲歲出石磧數千輸廟中名曰霹靂磧給霹靂用從春雷出磧日減至秋而盡

玄中記

服鼈鯉次之山有鳥名橐鼈服其毛羽令人不畏雷  
山海經  
食魚正過之水其內有飛魚食之不畏雷郭璞讚曰飛魚如豚赤文無羽食之辟兵不畏雷音

山海經

雷穴興州一處名雷穴每雷聲水塞穴流魚隨流而百姓每候雷聲繞樹網獲魚無限

商陽雜俎

雷塘柳州有雷山雨崖皆東西雷水出焉蓄崖中曰雷塘能出氣氣作雷雨變見有光禱用俎魚豆蠶脩形糈

稌陰酒虔則應

柳文

雷聲雷聲兜率天作歌頌音闔浮提作海潮音

酉陽雜俎

雕雷雷部鬼神畫勞夕役動有挫楚大則考戮屑雲雕

雷無有已時檄龍命鴉以息彼作

玉樞經

雷同後漢桓譚疏云畧雷同之俗語詳通人之雅謀注雷之發聲衆物同應俗人無是非之心出言同者謂之

雷同馮衍顯志賦紛綸流於權利兮親雷同而妬異

雷神雷澤有雷神龍首人身鼓其腹則雷

山海經

五雷玉霄一府所統三十六天內院中司東西華臺玄

館妙閣四府六院及諸有司各分曹局所以總司五雷

天臨三界者也

王樞經

雷耕雷人陰冥雲霧之夕呼為雷耕曉視田中必有開

墾之迹有是乃為嘉祥

投荒雜錄

雷歲村民鑿山為穴多品供雷冀雷享之名雷藏

番禺雜記

雷郎民家女或為神所依即呼為雷郎得子曰雷子

同上

玉虎令訾野中有玉虎晨鳴雷聲聖人感期而興

括地  
災

不益醬雷不益醬俗說今人腹中雷鳴

風俗  
通

今月上下

如弦之時觸醬輒壞里俗忌之

埤雅

戒容止雷將發聲有不戒其容止者生於不備必有凶

灾

月雷電之子必病癲狂

玄女房  
中經

## 電

雷解說文云電陰陽激燿也字指曰儻爚電光也釋名

云殄也乍見則殄滅也

雷光電謂之雷光

五經通義

陽光禮記月令二月始電疏云電陽光陽微則光不見此月陽氣漸盛以擊於陰其光乃見

陰陽分爭曾子曰陰陽之氣交則為電莊子曰陰氣伏於黃泉陰氣上通於天陰陽分爭故為電

列缺大人賦貫列缺之倒景服虔曰天閃也

前書思玄賦

列缺大人賦貫列缺之倒景服虔曰天閃也

後書噬嗑列缺搏礪磧灼傳

曰列缺搏雷之動也礪碑灼電之耀也

元

月支獻猛獸

兩目如天礪碑之交光

十洲記

宣示光耀太平之世電不睖目宣示光輝而已

西京雜記

繞斗黃帝有熊氏母曰附寶有蟜氏之女也見大電光

繞北斗樞星照郊野感附寶而孕

帝王世紀

天笑仙傳拾遺木公與一玉女投壺設不入者天為之  
嚙噙注嚙噙開口而笑神異經東王公與玉女投壺泉  
而脫誤不接者天為之笑開口流光今電是也

弄雷電西王母曰東方朔為太山仙官太上使至方丈  
勅三天司命朔但務山水遊戲擅弄雷電激波揚風致  
令蛟螭陸行山崩海竭太上謫斥使在人間

漢武故事

目爛如電王戎幼而聰悟神彩秀徹視日不眩裴楷目

之曰戎眼爛如巖下電

晉書

繞室上元中台州一道士王遠知善易善知人死生禍  
福作摠十五卷一日因曝書雷雨忽至赤電遙室在暝  
霧中一老人叱曰所泄者書何在上帝令吾攝六丁雷

電追取遂失易揔

龍城錄

繞案睦昭符金陵人保大中常州刺史一日坐聽事雷雨暴至電光如金蛇繞案吏卒皆震伏昭符不懼撫案叱之雷電遽散及舉案惟得鐵索重百斤昭符亦不變

色徐命舉索納庫中

南唐書

四方電東方有電名曰無厚南方有電名曰順流西方有電名墮光明北方有電名百生樹無厚與墮光明相觸相對順流與百生相觸相對故虛空雲聚之中出生

大明名曰電光

起世經

烜烜豐雷礮礮其聲震也電烜烜其光眩也

元包

雲

陰陽聚陰陽聚為雲

春秋元命包

山川氣說文曰雲山川氣也又曰大澤之潤氣也洪範五行傳云雲起於山而彌於天

舍陽雲之為言運也觸石而起謂之雲舍陽而起以精運也

春秋說題辭

天地之本雲者天地之本也

河圖帝通紀

雨具荀顥上書順帝云夫賢者化之本雲者雨之具也得賢而不用猶久陰而不雨也

後漢書

地氣黃帝素問云清揚為天濁陰為地地氣上為雲天氣下為雨雨出地氣雲出天氣注曰陰凝上結則合以成雲陽散下流則注而為雨雨從雲以施化故言雲出地氣憑氣以交合故言雲出天

友風子雨雲賦云託地而游宇友風而子雨

荀子

雲翳初出為雲繁雲為翳

論衡

雲泉相應黃泉之埃上為黃雲青泉之埃上為青雲赤泉之埃上為赤雲白泉之埃上為白雲玄泉之埃上為

玄雲

河圖始開

比類示人呂氏春秋曰山雲草莽水雲魚鱗旱雲烟火

雨雲水氣

淮南子作  
津雲波水

無不比類其所生以示人

各國雲象韓雲如布趙雲如牛楚雲如日宋雲如車魯雲如馬衛雲如犬周雲如輪秦雲如行人魏雲如鼠齊

雲如絳衣越雲如龍頭蜀雲如倉囷

兵書

扶日呈瑞蒼帝起青雲扶日赤帝起赤雲扶日黃帝起

黃雲扶日白帝起白雲扶日

洛書

五雲周禮保章氏以五雲之物辨吉凶水旱豐荒之祲  
鄭司農注二至二分觀雲氣青為蟲白為喪赤為兵荒  
黑為水黃為豐

慶雲史記曰若煙非煙若雲非雲郁郁紛紛蕭索輪囷  
是謂卿雲卿雲見喜氣也

漢書作慶

西京雜記董仲舒曰太

平之時雲則五色而為慶三色而成矞

景雲景雲孫氏瑞應圖曰景雲者太平之應也一曰慶雲非氣非煙氤氳五色謂之慶雲春秋運斗樞曰天子孝則景雲出游禮斗威儀曰景明也言雲氣光明也蔡邕什誨曰屬炎氣於景雲

梢雲孫氏瑞應圖云梢雲瑞雲人君德至則出若樹木稍稍然也郭璞江賦梢雲冠其巒

紀官左傳鄭子曰黃帝以雲紀故為雲師而雲名服虔

曰黃帝受命得景雲之瑞故以雲紀事杜預曰縉雲氏  
蓋其一官也

合符釜山史記黃帝合符釜山洞冥記東方朔云東海  
大明之墟有釜山山出瑞雲應王者之符命如堯時有  
赤雲之祥之類蓋黃帝黃雲之瑞故曰合符應於釜山  
也春秋演孔圖云黃帝之將興黃雲升於堂

金枝玉葉黃帝與蚩尤戰於涿鹿之野常有五色雲氣  
金枝玉葉止於帝上有花葩之象因作華蓋古今注

沉璧雲起堯沉璧於河白雲起迺風搖落

尚書中候

卿雲歌舞為賓客禹為主人百工相和而歌卿雲帝乃倡曰卿雲爛兮禮縵縵兮於是八風脩通卿雲叢聚注言和氣應也叢或為族或以雲出為岫迺薄而難以名狀也

白雲入房春秋孔演圖曰文命之僕玄龍御雲天命於湯白雲入房注白雲金精入湯房也

青雲浮河成王觀於洛河沈璧禮畢王退俟至於日昧

榮光併出幕河青雲浮洛

尚書  
中候

灰滅楚有蒼雲如霓圍軒七蟠中有荷斧之人向軒而蹲太史唐勒以葭灰遺於地乃更滅拂之其蒼雲為之半滅又遺灰乃盡去之故曰唐史之策上滅蒼雲

春秋文曜

鈎盧灰投地蒼雲自滅

感應從

朝雲赤帝女姚姬未行而卒葬於巫山之陽故曰巫山之女楚懷王遊於高唐晝寢夢見與神遇自稱是巫山之女王因幸之去而辭曰妾在巫山之陽高丘之岨旦

為朝雲暮為行雨朝朝暮暮陽臺之下旦朝視之如言故為立廟號曰朝雲

襄陽耆舊傳宋玉集

芒碭雲氣高祖隱於芒碭山澤間呂后與人俱求常得之高祖怪問之呂后曰季所居上常有雲氣故從往常得季

漢書

彤雲晝聚素靈夜哭陸機高祖功臣頌

覆鼎武帝時汾陰得寶鼎迎至中山晏溫有黃雲焉

漢書

白雲為蓋武帝封泰山禪肅然山其夜若有光晝有白

雲出封中

漢志

上禪肅然白雲為蓋

漢武故事

紫雲輦西王母乘紫雲輦雲氣勃鬱盡為香氣

漢武內傳

青雲于呂天漢三年月氏國獻神香使者曰國有常占

東風入律十旬不休青雲于呂連月不散意中國有好

道之君

十洲記

吉雲東方朔至東極遇吉雲之澤雲起五色草木皆成  
五色露帝得之徧賜羣臣

洞冥記

凌雲相如作大人賦帝覽之飄飄有凌雲之氣

漢書

雲成宮闕光武封泰山雲氣成宮闕百官並見之儀

封禪

去後雲起薊子訓至各公卿以下候之者恒數百人後因遁去初去之日唯見白雲騰起如是數十處

後漢書

開雲見日獻帝使趙岐解關東罷兵公孫瓊與袁紹書

云趙大僕銜命來征宣揚朝恩若開雲見日

後漢紹傳

披雲覩天樂廣為尚書令衛瓘見而奇之命諸子造焉曰每見此人瑩然若披雲霧而覩青天

晉書

雲鬪咸和元年鬪雲聲如暴風雨

晉書

落身世祖在江洲起義建牙軍有紫雲二段落於身上

宋書高祖北征至洛陽常有紫雲見於軍上

宋書

思親狄仁傑為并州法曹其親在河陽別業赴任於并  
登太行白雲孤飛曰吾親舍所居近此雲下悲泣佇立  
久之候雲移乃行

唐新語

謬圖五色中宗后韋氏禁中謬傳有五色雲氣后衣笥  
帝圖以示諸朝因大赦天下

唐書

賊瑞建中三年冬十月庚申朱滔王武俊田悅李納為  
壇魏西祀天各僭為王滔等三讓乃就位是日三叛軍

上有雲氣頗異燧望笑曰是雲無知乃為賊瑞耶

唐書

表符唐正元壬午有五色雲見長安太史張璇曰在宋分後一百六十年有聖人興其地至天成丁亥宋祖生洛陽

五色蓋廳拾遺崔希喬轉馮翊令有雲如蓋當其廳事

前須臾五色錯雜徧於州郭

唐書

天瑞鄭洎子仁規仁表皆豪爽有文表嘗以門闈文章自高曰天瑞有五色雲人瑞有鄭仁表

唐書

雲氣甚嘉五代呂師周謂其裨將綦毋章曰吾與楚人  
為敵境吾嘗望其營上雲氣甚嘉未易敗也

楚馬殷傳

鳳竹祥符元年封泰山十月壬辰天文院言紫雲如蓋

黃雲如龍鳳青雲如竹木名稍雲

宋史

五色天聖五年仁宗初臨軒試進士琦名在第二時唱  
名第一甲方終太史奏日下五色雲見左右從官皆賀

於殿上

韓琦家傳

貢雲宣和中艮嶽初成令近山多造油絹囊以水濕之

曉張於危巒絕巘之間既而雲盡入遂括囊以獻名曰

貢雲每車駕所臨則盡縱之須臾渝然充塞如在千巖

萬壑間

齊東野語又載東坡山歸牧白雲入籠放之作擾雲篇

雲將莊子曰雲將東遊過扶搖之枝而適遭鴻蒙曰天

氣不和地氣鬱結六氣不調四時不節今我願合六氣

之精以育羣生

李注云雲將雲主師也

五嶽雲公羊傳曰觸石而出膚寸而合不崇朝而徧乎天下者惟泰山雲耳尚書大傳五嶽皆觸石出雲

四海雲淮南子云先王之政四海之雲至而脩封疆注  
云立春之後四海出雲

八極雲八極之雲是雨天下八門之風是節寒暑八紘  
八演大澤之雲以雨九州而和中土

淮南子

周雲淮南子云周雲之籠從遼巢澎湃而為雨注周密  
也籠從聚合也遼巢澎湃蘊藉貌也

圜圜書曰圜圜升雲半有半無圜回行也

說文

云云呂氏春秋曰雲氣西行云云然冬夏不輟

雲輿仲長統詩春雲為輿秋風為駟傅亥詩雲為車兮  
風為馬

金翹雲卷金翹日輝合壁紅塵暗陌丹霞映峙金樓子

雲互王僧達祭顏延年文云情條雲互謝靈運辨論云  
情理雲互物已相傾李陵詩云仰視驚雲逝紛紛互相  
踰

礮車雲暴風之候有砲車雲

國史補

舟人占雲若砲車起

急避之乃大風候也東坡詩終日江頭天色惡砲車雲起

風欽作

南雲陸機思親賦指南雲以寄欽望歸風而效誠  
陸雲贈鄭曼季詩聲播東汜響溢南雲宋文帝北伐詩云不  
覩南雲陰但見胡風起江總揚州九日詩心逐南雲逝  
形隨北鴈來謝靈運上書云注心南雲為日已久

東雲義熙七年朱齡石代蜀袁豹為檄文云梁益人士  
驅迫一時待命寇讎之戮岐區豺狼之吻豈不遡誠南

凱延首東雲

宋  
湛  
傳

雕雲顏延年詩雕雲麗璇蓋祥飈被綵旂南齊祥瑞志  
流火赤雀實紀周祚雕雲素靈發祥漢氏沈炯陳武帝  
哀策雕雲布族祥星結樞

愁雲班婕妤擣素賦停風軒而結睇對愁雲之浮沉傳  
玄詩浮雲含愁色悲風坐自嘆謝惠連雪賦寒風積愁  
雲繁

渫雲蜀都賦窮岫渫雲日月恒翳謝玄暉詩渫雲已漫  
漫多雨亦淒淒

纖雲曹植魏德論  
纖雲不形陽光赫  
戲傳卉詩纖雲時  
鬢霑渥露霑我裳

鮮雲陸士衡悲哉行  
和風飛清響鮮雲垂薄陰  
崇雲猛虎行  
崇雲臨岸駭鳴條隨風吟

曾雲園葵詩  
曾雲無溫液嚴霜有凝感

歸雲擬古詩  
驚飈褰反信  
歸雲難寄音

流雲顏延年詩  
流雲藹青闕皓月鑒丹空

石梁雲應襄陽石梁山出雲應驗符合鄉人候之若曰

雲起定雨黃雲起則風黑雲起則多病

物類相感志

崑崙五色崑崙山有九層每層相去萬里有雲氣五色

從下望之皆有城闕之象崑崙者西方曰須彌山有九

層其第七層有景雲出以映朝日

拾遺記

香雲負嶠山一名環丘有雲石駁駘如錦川扣之則一片翁翁然雲出俄而遍潤天下西有星池有爛石常浮於水邊其色紅質虛似肺燒之有煙香聞數百里煙氣

升天則成香雲遍潤則成香雨

同上

屯雲曹子建漢高贊云屯雲斬蛇傳玄詩屯雲結不解

謝靈運詩屯雲被曾嶺

霧

陰陽亂氣陰陽之氣亂則霧

曾子

積水上溢騰水上溢故為霧

莊子

百邪之氣霧者百邪之氣為陰冒陽本於地而行於天

五行志

霧不塞望太平之世霧不塞望浸淫被泊而已

西京雜記

三日霧黃帝時天大霧三日帝遊洛水之上見大魚殺五牲以烹之天乃甚雨七日七日魚沉始得圖書焉今之河圖即其書也世傳大霧三日必有甚雨自此始也

帝王  
世紀

蚩尤作霧黃帝與蚩尤戰於涿鹿之野蚩尤作大霧彌三日軍人皆惑黃帝乃令風后法斗機作指南車以別

四方遂擒蚩尤焉

志林

地吐黃霧桀無道地吐黃霧

尚書  
中候

伊尹卒霧三日伊尹卒年百有餘歲天霧三日沃丁葬

以天子之禮

帝王世紀

伊尹受戮大霧三日

抱朴子

開而覩天文王遇姜公於渭陽執竿而釣文王得之灼

若披雲而見白日霍若開霧而覩青天

徐幹中論

噴水為霧燕昭王七年沐胥國來朝有道術人名尸羅

噴水為霧霧暗數里間俄復吹為疾風霧霧皆止

拾遺記

大霧免難高祖至平城為匈奴所圍七日天大霧漢使

人還往胡不覺後得免平城之難

漢書

乘霧東方朔乘雲飛去仰望天霧覆之不知所在

漢武內傳

立起雲霧淮南王聞有道術之士必卑辭厚幣以致之

於是八公乃往一人能坐致風雨立起雲霧

神仙傳

東海

人黃公立興雲霧坐成山河

西京雜記

陰侵陽成帝建始中黃霧四塞上問揚興等對曰陰盛

侵陽之氣也

漢書

王氏五侯同日俱封其日黃霧四塞

還蜀樂巴為尚書郎忽一旦天大霧對坐不相見失巴

所在尋問之云其日還成都與親故別時亦風雨晦冥

葛洪神  
仙傳

蜀郡鄧公呼吸成霧

子蘓

能作霧張楷字公超有道術居華山谷中能為五里霧人學其術者填門如市故云霧市神仙傳時關西人裴優亦能作三里霧自以不如楷往從學之楷避不見

謝承書

迷路曹公赤壁敗行雲夢大澤中遇大霧迷失道路

國志

不迷劉雄鳴每行雲霧中識道不迷時人謂能為霧

魏畧

半天劉先主遣軍取李曠先生起霧半天備騎自相殺

先生乃入吳

李先生傳

冒霧王肅張衡馬均者昔俱冒霧行一人無恙一人病  
一人死無恙者飲酒病者食死者空腹

博物志

孝感盱眙民王彭先丁母艱居喪至孝元嘉之始父又  
喪亡彭兄弟二人土工未就鄉人助彭作塉塉事須水

濟值天旱穿井盡力不得水彭號窮無計一旦天霧霧

消之後於塉竈前自然水生

元嘉起居注

晝昏天寶間霧昏暗十步外不見人是謂晝昏

五行志

數里韓似在桂州有妖賊封盈能為數里霧聲言某日

將攻桂州有紫氣者我必勝至期果紫氣如疋帛自山亘於州城白氣直衝紫氣遂散天忽大霧至午稍霽

祖雜

枉殺致霧馬希聲矯殷令殺高郁是日大霧四塞殷怪之曰吾嘗從孫儒每殺不辜天必大霧豈馬步獄有冤

死乎明日吏以狀白殷撫膺大哭

五代楚世家

服霧霧者金石之盈氣女真張微子服霧得仙

迷空步障高麗見博學記呼霧迷為空步障

清異錄

素霧曲江縣有銀山山常多素霧

湘州記

金霧蓬萊山東有鬱夷國時有金霧



天中記卷二